

詞

綜

冊四



詞綜卷十九

宋詞六十六首

吳文英四十五首

蔣捷二十一首

吳文英字君特四明人從吳毅夫遊有夢窗甲乙

丙丁稿四卷

張叔夏云吳夢窗如七寶樓臺眩人眼目折碎下來不成片段 尹惟曉云求詞于吾宋前有清真後有夢窗此非予之言四海之公言也 沈伯時云夢窗深得清真之妙但用事下語太晦處人不易知

倦尋芳 饒周糾定夫

暮帆挂雨冰岸飛梅春思零亂送客將歸偏是故宮
離苑醉酒會同涼月舞尋芳還隔紅塵面去難留悵
芙蓉路窄綠楊天遠 便繫馬鶯邊清曉烟草晴花
沙潤香軟爛錦年華誰念故人遊倦寒食相思堤上
路行雲應在孤山畔寄新吟莫空回五湖春鴈

又花翁遇舊歡吳門老妓李憐邀分韻同賦此

詞

墜瓶恨井塵鏡迷樓空閑孤燕寄別崔徽清瘦畫圖
春面不約舟移楊柳繫有緣人映桃花見敘分攜悔

香瘢謾蒸綠鬢輕剪聽細語琵琶幽怨客鬢蒼華
衫袖濕濕徧漸老芙蓉猶自帶霜重看一縷情深朱戶
掩兩痕愁起青山遠被西風又驚吹夢雲分散

又上元

海霞倒影空霧飛香天市催晚暮鬢宮梅相對畫樓
簾捲羅襪輕塵花笑語寶釵爭豔春心眼亂簫聲正
風柔柳弱舞肩交燕念窈窕東鄰深巷燈外歌沉
月上花淺驚夢離雲點點漏壺清怨珠絡香消空念
往紗窗人老羞相見漸銅壺閉春陰曉寒人倦

燭影搖紅錢馮深居翼日深居初度

飛蓋西園晚秋恰勝春天氣霜花開盡錦屏空紅葉
新裝綴時放清杯泛水暗淒涼東風舊事夜吟不就
松影闌干月籠寒翠莫唱陽關但憑彩袖歌千歲
秋星入夢隔明朝十載吳宮會一棹回潮渡葦正西
窗燈花報喜柳蠻櫻素試酒爭憐不教不醉

法曲獻仙音和丁宏庵韻

落葉霞翻敗窗風咽暮色淒涼深院瘦不關秋淚緣
生別情銷鬢霜千點悵翠冷搔頭燕那能語恩怨
紫簫遠記桃枝向隨春渡愁未洗鉛水又將恨染粉
縵澀離箱忍重拈燈夜裁剪望極藍橋彩雲飛羅扇

歌斷料鸚籠玉鎖夢裏隔花時見

憶舊游別黃澹翁

送人猶未苦苦送春隨人去天涯片紅都飛盡陰陰
潤綠暗裏啼鴉賦情頓雪雙鬢飛夢逐塵沙歎病渴
淒涼分香瘦減兩地看花 西湖斷橋路想繫馬垂
楊依舊敬斜葵麥迷烟處問離巢孤燕飛過誰家故
人爲寫深怨空壁掃秋蛇但醉上吳臺殘陽草色歸
思賒

點絳脣懷蘇州

明月茫茫夜來應照南橋路夢遊熟處一枕啼秋雨
可惜人生不向吳城住心期誤鴈將秋去天遠青
山暮

又試燈夜初晴

捲盡愁雲素娥臨夜新梳洗暗塵不起酥潤凌波地
輦路重來彷彿燈前事情如水小樓薰被春夢笙
歌裏

又

推枕南窗楝花寒入單紗淺雨簾不捲空礙調雛燕
一握柔葱香染榴巾汗音塵斷畫羅閑扇山色天
涯遠

又

時霎清明載花不過西園路嫩陰綠樹正是春留處
燕子重來往事東流去征衫貯舊寒一縷淚濕風
簾絮

西子妝夢窗自度腔湖上清明薄遊

流水麴塵艷陽酷酒畫舸遊情如霧笑拈芳草不知
名乍凌波斷橋西堍垂楊謾舞總不解將春繫住燕
歸來問綵繩纖手如今何許歡盟誤一箭流光又
趁寒食去不堪衰鬢著飛花傍綠陰冷烟深樹玄都
秀句記前度劉郎曾賦最傷心一片孤山細雨

唐多令

何處合成愁離人心上秋縱芭蕉不雨也颼颼都道
晚涼天氣好有明月怕登樓年事夢中休花空烟
水流燕辭歸客尚淹留垂柳不繫裙帶住謾長是繫
行舟

張叔夏云此詞疎快不質實

玉漏遲中秋

鴈邊風訊小飛瓊望杳碧雲先晚露冷闌干定怯藕
絲冰腕淨洗浮雲片玉勝花影春燈相亂秦鏡滿素
娥未肯分秋一半每圓處卽良宵甚此夕偏饒對
歌臨怨萬里嬋娟幾許霧屏雲幔孤兔淒涼照水曉

風起銀河西轉摩淚眼瑤臺夢回人遠

祝英臺近除夜立春

剪紅情裁綠意花信上釵股殘日東風不放歲華去
有人添燭西窗不眠侵曉笑聲轉新年鶯語舊樽
俎玉纖曾擘黃柑柔香繫幽素歸夢湖邊還迷鏡中
路可憐千點吳霜寒銷不盡又相對落梅如雨

又春日客龜溪游廢園

采幽香巡古苑竹冷翠微路鬪草溪根沙印小蓮步
自憐兩鬢清霜一年寒食又身在雲山深處晝閑
度因甚天也慳春輕陰便成雨綠暗長亭歸夢趁風
絮有情花影闌干鶯聲門徑解留我霎時凝竚

又上元

晚雲開朝雪霽時節又燈市夜約遺香南陌少年事
笙簫一片紅雲飛來海上繡簾捲細桃春起舊遊
地素娥城闕年年新妝趁羅綺玉練冰輪無塵澗流
水曉霞紅處啼鴉良宵一夢畫堂正日長人睡

霜花腴重陽前一日汎石湖

翠微路窄醉晚風憑誰爲整敬冠霜餉花腴燭銷人
瘦秋光做也都難病懷強寬恨鴈聲偏落歌前記年
時舊宿淒涼暮烟秋雨野橋寒妝壓鬢英爭艷度

清商一曲暗墜金蟬芳節多陰蘭情稀會晴暉稱拂
吟箋更移畫船引珮環邀下嬋娟算明朝未了重陽
紫萸應耐看

喜遷鶯同丁基仲過希道家看牡丹

凡塵流水正春在絳闕瑤堦十二暖日明霞天香盤
錦低映曉光梳洗故苑浣花沉恨化作天紅斜紫困
無力倚闌干還倩東風扶起 公子留意處羅蓋牙
籤一一花名字小扇翻歌密圍留客雲葉翠溫羅綺
灑灑紫金盃重人倚妝臺微醉夜和露剪殘枝點點
花心清淚

又福山蕭寺歲除

江亭年暮趁飛鴈又聽數聲柔櫓藍尾杯單膠牙錫
淡重省舊時鬪旅雪舞野梅籬落寒擁漁家門戶晚
風峭做初番花信春還知否 何處圍艷冶紅燭畫
堂博篋良宵午誰念行人愁先芳草輕送年華如羽
自剔短檠不睡空索彩桃新句便歸好料鵝黃已染
西池千縷

聲聲慢閨重九飲郭園

檀欒金碧婀娜蓬萊遊雲不蘸芳洲露柳霜蓮十分
點綴殘秋新彎畫眉未穩似含羞低度牆頭愁送遠

駐西臺車馬共惜臨流 知道池亭多宴掩庭花長
是驚落秦謳膩粉闌干猶聞凭袖香留輸他翠漣拍
鬢瞰新妝終日凝眸簾半捲帶黃花人在小樓

又錢魏繡使泊吳江爲友人賦

旋移輕鷁淺傍垂虹還因送客遲留淚雨橫波遙山
眉上新愁行人倚欄心事問誰知只有沙鷗念聚散
幾楓丹霜渚萼綠春洲 漸近香菰炊黍想紅絲織
字未遠青樓寂寞漁鄉爭如連醉溫柔西窗夜深剪
燭夢頻生不放雲收共悵望認孤烟起處是舟

高陽臺落梅

宮粉彫痕仙雲墮影無人野水荒灣古石埋香金沙
鎖骨連環南樓不恨吹橫笛恨曉風千里關山半飄
零庭上黃昏月冷闌干 壽陽宮裏愁鸞鏡問誰調
玉髓暗補香瘢細雨歸鴻孤山無限春寒離魂難倩
招清些夢縞衣解珮溪邊最愁人啼鳥晴明葉底清
圓

又豐樂樓

脩竹凝妝垂楊駐馬憑欄淺畫成圖山色誰題樓前
有鴈斜書東風緊送斜陽下弄舊寒晚酒醒餘自消
疑能幾花前頓老相如 傷春不在高樓上在燈前

敬枕雨外熏爐怕艤遊船臨流可奈清癯飛紅若到
西湖底攬翠瀾總是愁魚莫重來吹盡香綿淚滿平
蕪

滿江紅 澱山湖

雲氣樓臺分一派滄浪翠蓬開小景玉盆寒浸巧石
盤松風送流花時過岸浪搖晴練欲飛空算鮫宮祗
隔一紅塵無路通 神女驚凌曉風明月低響丁東
對兩蛾猶鎖怨綠烟中秋色未教飛盡鴈夕陽長是
墜疎鐘又一聲欸乃過前岩移釣篷

遶佛閣

暗塵四斂樓觀迥出高映孤館清漏將短厭聞夜久
籤聲動書幔桂花又滿閑步露草偏愛幽遠花氣清
婉望中迤邐城陰度河岸 倦客最蕭索醉倚斜陽
穿柳綫還似汴隄虹梁橫水面看浪颺春燈舟下如
箭此行重見歎故友難逢羈思空亂兩眉愁向誰舒
展

解語花 梅花

門橫皴碧路入蒼烟春近江南岸暮寒如剪臨溪影
一半斜清淺飛翼弄晚蕩千里暗香平遠端正看
瓊樹三枝總似蘭昌見 酥瑩雲容夜暖伴蘭翹清

瘦蕭鳳柔婉冷雲荒翠幽棲久無語暗申春怨東風
半面料準擬何郎詩卷歡未闌烟雨青黃宜晝陰庭
館

荔支香近七夕

輕睡時聞晚鵲噪庭樹又說今夕天津西畔重歡遇
蛛絲暗鎖紅樓燕子穿簾處天上未比人間更情苦
秋鬢改如月姊長眉嫵過雨西風數葉井梧秋舞
夢入藍橋幾點疎星映朱戶淚濕沙邊凝竚

尉遲杯賦楊公小蓬萊

垂楊逕洞鑰啓時遣流鶯迎涓涓暗谷流紅應有細
桃千頃臨池笑靨春色滿銅華弄妝影記年時試酒
湖陰褪花曾采新杏珠窗繡網玄經纔石研開奩
雨潤雲凝小小蓬萊香一掬愁不到朱嬌翠靚清樽
伴人間日永斷琴和棋聲竹露冷笑從前醉臥紅塵
不知仙在人境

霜葉飛重九

斷烟離緒關心事斜陽紅隱霜樹半壺秋水薦黃花
香嘆西風雨縱玉勒輕飛迅羽淒涼誰弔荒臺古記
醉踏南屏彩扇咽寒蟬倦夢不知蠻素聊對舊節
傳杯塵箋蠹管斷闕經歲慵賦小蟾斜影轉東籬夜

冷殘蛩語早白髮緣愁萬縷驚飈從捲烏紗去謾細
將茱萸看但約明年翠微高處

瑞鶴仙

淚荷拋碎壁正漏雲篩雨斜捎窗隙林聲怨秋色對
小山不送寸眉愁碧涼欺岸幘暮砧催銀屏剪尺最
無聊燕去堂空舊幕暗塵羅額行客西園有分斷
柳淒花似曾相識西風破屐林下路水邊石念寒蛩
殘夢歸鴻心事那聽江村夜笛看雪飛蘋底蘆梢未
如鬢白

又贈道女陳華山內夫人

彩雲棲翡翠聽鳳笙吹下飛駟天際晴霞翦輕袂澹
春姿雪態寒梅清泚東皇有意旋安排闌干十二早
不知爲雲爲雨盡日建章門閉堪比紅綃纖素紫
燕輕盈內家標致游仙舊事星斗下夜香裏□華峯
□□紙屏橫幅春色長供午睡更醉乘玉井秋風采
花弄水

齊天樂

新烟初試花如夢疑收楚峯殘雨茂苑人歸秦樓燕
宿同惜天涯爲旅遊情最苦早柔綠迷津亂莎荒圃
數樹梨花晚風吹墮半汀鷺流紅江上去遠翠樽

曾共醉雲外別墅淡月秋千幽香巷陌愁結傷春深
處聽歌看舞駐不得當時柳蠻櫻素睡起慙慙洞簫
誰院宇

又

烟波桃葉西陵路十年斷魂潮尾古柳重攀輕鷗驟
別陳迹危亭獨倚涼颺乍起渺烟磧飛帆暮山橫翠
但有江花共臨秋鏡照憔悴華堂燭暗送客眼波
回盼處芳艷流水素骨凝冰柔葱蘸雪猶憶分瓜深
意清樽未洗夢不濕行雲謾沾殘淚可惜秋宵亂蛩
疎雨裏

掃花遊送春古江村

水園沁碧驟夜雨飄紅竟空林島艷春過了有塵香
墜鈿尚遺芳草步繞新陰漸覺交枝逕小醉深窈窕
綠葉翠圓勝看花好芳架雪未掃怪翠被佳人困
迷清曉柳絲繫棹問閨門自古送春多少倦蜨慵飛
故撲簪花破帽醉殘照掩重城暮鐘不到

瑞龍吟德清清明競渡

大溪面遙望繡羽衝烟錦梭飛練桃花三十六陂鮫
宮睡起嬌雷乍轉去如箭催趁戲旗遊鼓素瀾雪
濺東風冷濕鮫腥淡陰送晝輕霏弄晚洲上青蘋

詞

卷十九

六一中華書局聚

生處鬪春不管懷沙人遠殘日半開一川花影零亂
山屏醉纈連掉東西岸闌干倒千紅妝靨鉛香不斷
傍暝疎簾捲翠漣皺淨笙歌未散算柳嬌桃嬾猶自
有玉龍黃昏吹怨重雲暗閣春霖一片

解蹀躞

醉雲又兼醒雨楚夢時來往倦蜂剛著梨花惹游蕩
還做一段相思冷波葉舞愁紅送人雙槳暗凝想
情共天涯秋黯朱橋鎖深巷會稀投得輕分頓惆悵
此去幽曲誰來可憐殘照西風半妝樓上

玉樓春京市舞女

茸茸狸帽遮梅額金蟬羅剪胡衫窄乘肩爭看小腰
身倦態強隨閑鼓笛問稱家住城東陌欲買千金
應不惜歸來困頓殢春眠猶夢婆娑斜趁拍

澡蘭香淮安重午

盤絲繫腕巧篆垂簷玉隱紺紗睡覺銀瓶露井彩筆
雲窗往事少年依約爲當時曾寫榴裙傷心紅綃褪
萼黍夢光陰漸老汀洲烟藹莫唱江南古調怨抑
難招楚江沉魄薰風燕乳暗雨梅黃午鏡澡蘭簾幕
念秦樓也擬人歸應剪菖蒲自酌但悵望一縷新蟾
隨人天角

惜紅衣 余從姜石帚遊苕霅間三十五年矣重

來傷今感昔聊以詠懷

鷺老秋絲蘋愁暮雪鬢那不倒柳移栽如今暗溪
碧烏衣細語傷伴惹茸紅曾約南陌前度劉郎尋流
花踪跡 朱樓水側雪面波光汀蓮沁顏色當時醉
近繡箔夜吟寂三十六磯重到清夢冷雲南北買釣
舟溪上應有烟簑相識

風入松

聽風聽雨過清明愁草瘞花銘樓前綠暗分攜路一
絲柳一寸柔情料峭春寒中酒交加曉夢啼鶯 西
園日日掃林亭依舊賞新晴黃蜂頻撲秋千索有當
時纖手香凝惆悵雙鴛不到幽塔一夜苔生

鶯啼序

殘寒正欺病酒掩沉香繡戶燕來晚飛入西城似說
春事遲暮畫船載清明過却晴烟冉冉吳宮樹念羈
情游蕩隨風化為輕絮 十載西湖傍柳繫馬趁嬌
塵輕霧遡紅漸招入仙溪錦兒偷寄幽素倚銀屏春
寬夢窄斷紅濕歌紈金縷暝隄空輕把斜陽總還鷗
鷺 幽蘭旋老杜若還生水鄉尚寄旅別後訪六橋
無信事往花萎瘞玉埋香幾番風雨長波如眇遙山

羞黛漁燈分影春江宿記當時短楫桃根渡青樓彷彿臨分敗壁題詩淚墨慘淡塵土危亭望極草色天涯歎鬢侵半苧暗點檢離痕歡唾尚染鮫綃鞦韆鳳迷歸破鸞慵舞殷勤待寫書中長恨藍霞遼海沈過鴈謾相思彈入哀箏柱傷心千里江南怨曲重招斷魂在否

玉漏遲

絮花寒食路晴絲罥日綠陰吹霧客帽欺風愁滿畫船烟浦綵挂秋千散後悵塵鎖燕簾鶯戶從間阻夢雲無準鬢霜如許夜久繡閣藏嬌記掩扇傳歌剪燈留語月約星期細把花鬢頻數彈指一襟怨恨謾空倩啼鶻聲訴深院宇黃昏杏花微雨

金盞子

吳城連日賞桂一夕風雨悉已零落獨

寓窗晚花方作小蕾未及見開遂有新
邑之役竭來西館籬落間嫣然一枝可
愛見侶人而喜爲賦此解

賞月梧園恨廣寒宮樹曉風搖落莓砌掃蛛塵空腸斷薰爐燼消殘萼殿秋尚有餘花鎖烟窗雲幄新鴈又無端送人江上短亭初泊籬角夢依約人一笑惺忪翠袖薄悠然醉魂喚醒幽叢畔淒香霧雨漠漠

晚吹乍顛秋聲早屏空金雀明朝想猶有數點蜂黃
伴我斟酌

絳都春

余往來清華池館六年賦咏屢以感昔傷今益不堪懷乃復作此解

春來鴈渚弄豔冶又入垂楊如許困舞瘦腰啼濕宮
黃池塘雨碧沿蒼蘚雲根路尚追想凌波微步小樓
重上憑誰爲唱舊時金縷凝竚烟蘿翠竹欠羅袖
爲倚天寒日暮強醉梅邊招得花奴來樽俎東風須
惹春雲住更莫把飛瓊吹去便教攜取熏籠夜溫繡
戶

十二郎 垂虹橋上有垂虹亭屬吳江

素天際水浪拍碎凍雲不疑記曉葉題霜秋燈吟雨
曾繫長橋過艇又是賓鴻重來後猛賦得歸期纔定
嗟繡鴨解言香鱸堪釣尚廬人境幽興爭如共載
月娥妝鏡念倦客依前貂裘茸帽重向淞江照影醉
酒蒼茫倚歌平遠亭上玉虹腰冷迎醉面暮雪飛花
幾點黛愁山暝

蔣

捷字勝欲義興人有竹山詞一卷

賀新郎

渺渺啼鴉了巨魚天寒生峭嶼五湖秋曉竹几一鐙

人做夢嘶馬誰行古道起搔首窺星多少月有微黃
籬無影挂牽牛數朵青花小秋太淡添紅棗 愁痕
倚賴西風掃被西風翻催鬢鬢與秋俱老舊院隔霜
簾不捲金粉屏邊醉倒計無此中年懷抱萬里江南
吹簫恨恨參差白鴈橫天杪烟未斂楚山杏

又約友三月旦飲

鴈嶼晴嵐薄倚層屏千樹高低粉纖紅弱雲隘東風
藏不盡吹豔生香萬壑又散入汀蘆洲藥擾擾匆匆
塵上面看歌鶯舞燕逢春樂人共物知誰錯 寶釵
樓上圍簾幕小嬋娟雙調彈箏半霄鸞鶴我輩中人
無此分琴思詩情當却也勝似愁橫眉角芳景三分
才過二便綠陰門巷楊花落沾斗酒且同酌

又

夢冷黃金屋歎秦箏斜鴻陣裏素絃塵撲化作嬌鶯
飛歸去猶認窗紗舊綠正過雨荆桃如菽此恨難平
君知否似瓊臺湧起彈碁局消瘦影嫌明燭 鴛樓
碎瀉東西玉問芳踪何時再展翠釵難卜待把宮眉
橫雲樣描上生綃畫幅怕不是新來妝束綵扇紅牙
今都在恨無人解聽開元曲空掩袖倚寒竹

世間何處最難忘
杯酒惟是停雲想
親友此時無一
盞千種離愁
西風外長伴枯荷衰柳
去年深夜語
傾倒書窗窗燭心懸小
紅豆記得到門時
雨正蕭蕭
嗟今雨此情非舊待
與子相期采黃花
又未卜重陽
果能晴否

又柳

枝枝葉葉受東風
調弄便是鶯穿也
微動自鵝黃千
縷數到飛綿閑無事
誰管將春迎送
輕柔心性在
教得遊人酒舞花吟
恣狂縱更誰家鸞鏡裏
貪學織
蛾移來傍妝樓
新種總不道江頭鎖
清愁正雨渺烟
茫翠陰如夢

瑞鶴仙 鄉城見月

紺烟迷鴈跡
漸碎鼓零鐘街喧初息
風繫背寒壁放
冰蟾飛到蛛絲簾隙
瓊魂暗泣念鄉關
霜蕪似織謾
將身化鶴歸來
忘却舊遊端的
歡極蓬壺藻浸花
院梨溶醉連春夕
柯雲罷奕櫻桃在
夢難覓勸清光
乍可幽窗相伴
休照紅樓夜笛
怕人間換譜伊涼
素娥未識

白苧

正春晴又春冷
雲低欲落瓊苞未剖
早是東風作惡

旋安排一雙銀蒜鎮羅幕幽壑水生漪皺嫩綠潛鱗
初躍惜惜門巷桃樹紅纔約略知甚時霽華烘破青
青萼憶昨引蜨花邊近來重見身學垂楊瘦削問
小翠眉山爲誰攢却斜陽院宇任蛛絲罨徧玉箏絃
索戶外惟聞放剪刀聲深在妝閣料想裁縫白苧春
衫薄

女冠子元夕

蕙花香也雪晴池館如畫春風飛到寶釵樓上一片
笙簫琉璃光射而今燈謾挂不是暗塵明月那時元
夜况年來心癩意怯羞與蛾兒爭耍江城人悄初
更打問繁華誰解再向天公借剔殘紅爇但夢裏隱
隱鈿車羅帕吳箋銀粉研待把舊家風景寫成閑話
笑綠鬟鄰女倚窗猶唱夕陽西下

永遇樂綠陰

清逼池亭潤侵山閣雲氣凝聚未有蟬前已無蜨後
花事隨逝水西園支徑今朝重到半礙醉筇吟袂除
非是鶯身瘦小暗中引雛穿去梅簷滴溜風來吹
斷放得斜陽一縷玉子敲枰香綃落剪聲度深幾許
層層離恨淒迷如此點破謾煩輕絮應難認爭春舊
館倚紅杏處

高陽臺送翠英

燕捲晴絲蜂黏落絮天教綰住閑愁閑裏清明匆匆
粉澀紅羞燈搖縹緲暈茸窗冷語未闌娥影分收好傷
情春也難留人也難留 芳塵滿目悠悠爲問縈雲
珮響還繞誰樓別酒纔斟從前心事都休飛鶯縱有
風吹轉奈舊家苑已成秋莫思量楊柳灣西且擣吟
舟

絳都春

春愁怎畫正鶯背帶綠醑釀花謝細雨院深淡月廊
斜重簾挂歸時記約燒燈夜早拆盡千秋紅架縱然
歸近風光又是翠陰初夏 姹姪嚙青苴白恨玉珮
罷舞芳塵凝榭幾擬倩人付與香蘭秋羅怕知他墮
策斜攏馬在底處垂楊樓下無言暗擁嬌鬟鳳釵溜
也

聲聲慢秋聲

黃花深巷紅葉低窗淒涼一片秋聲豆雨聲來中間
夾帶風聲疎疎二十五點麗譙門不鎖更聲故人遠
問誰搖玉佩簷底鈴聲 彩角聲吹月墮漸連營馬
動四起笳聲閃爍鄰燈燈前尚有砧聲知他訴愁到
曉碎嚶嚶多少蛩聲訴未了把一半分與鴈聲

練月縈窗夢乍醒黃花翠竹庭館心字夜香消人孤
另雙鷓被他羞看擬待告訴天公減秋聲一半無情
鴈正用恁時飛來叫雲尋伴 猶記杏權煖銀燭下
纖影卸佩款春渦暈紅豆小鶯衣嫩珠痕澹印芳汗
自從信誤青鸞想籠鸚停喚風刀快但剪畫簷梧桐
怎剪愁斷

梅花引

白鷗問我泊孤舟是身留是心留心若留時何事鎖
眉頭風拍小簾燈暈舞對閑影冷清清憶舊遊 舊
遊舊遊今在否花外樓柳下舟夢也夢也夢不到寒
水空流漠漠黃雲濕透木綿裘都道無人愁似我今
夜雪有梅花似我愁

解珮令

春晴也好春陰也好著些兒春雨越好春雨如絲繡
出花枝紅裊怎禁他孟婆合阜 梅花風悄杏花風
小海棠風驀地寒峭歲歲春光被二十四風吹老棟
花風爾且慢到

虞美人聽雨

少年聽雨歌樓上紅燭昏羅帳壯年聽雨客舟中江

闌雲低斷雁叫西風 而今聽雨僧廬下鬢已星星
也悲歡離合總無情一任堦前點滴到天明

又梳樓

絲絲楊柳絲絲雨春在溟濛處樓兒忒小不藏愁幾
度和雲飛去覓歸舟 天憐客子鄉關遠借與花消
遣海棠紅近綠闌干纔捲朱簾却又晚風寒

祝英臺近 次韻惜別

柳邊樓花下館低卷繡簾半簾外天絲擾擾似情亂
知他蛾綠纖眉鵝黃小袖在何處閑遊閑翫 最堪
歎筆面一寸塵深玉柱網斜鴈譜字紅蕩剪燭記同
看幾回傳語東風將愁吹去怎奈向東風不管

行香子 舟宿閩灣

紅了櫻桃綠了芭蕉送春歸客尚蓬飄昨宵穀水今
夜蘭皋奈雲溶溶風淡淡雨瀟瀟 銀字笙調心字
香燒料芳踪乍整還凋待將春恨都付春潮過窈娘
堤秋娘渡秦娘橋

柳梢青 游女

學唱新腔秋千梁上釵股敲雙柳雨花風翠鬆裙褶
紅膩鞋幫 歸來門掩銀缸淡月裏疎鐘漸撞嬌欲
人扶醉嫌人問斜倚樓窗

霜天曉角 折花

人影窗紗是誰來折花折則從他折去知折去向誰
家 簷牙枝最佳折時高折些說與折花人道須插
向鬢邊斜

詞綜卷十九

詞綜卷二十

宋詞七十六首

陳允平二十二首

周密五十四首

陳允平字君衡號西麓明州人有日湖漁唱二卷

張叔夏云詞欲雅而正志之所之一為物

所役則失其雅正之音近代陳西麓所作

平正亦有佳者

摸魚兒 西湖送春

倚東風畫欄十二芳陰簾幕低護玉屏翠冷梨花瘦
寂寞小樓烟雨腸斷處悵折柳柔情舊別長亭路年
華似羽任錦瑟聲寒瓊簫夢遠羞對綵鸞舞 文園
賦重憶河橋眉嫵啼痕猶濺紈素丁香共結相思恨
空託繡羅金縷春已暮縱燕約鶯盟無計留春住傷
春倦旅趁暗綠稀紅扁舟短棹載酒送春去

絳都春

鞦韆倦倚正海棠半坼不耐春寒帶雨弄晴飛梭庭
院繡簾閑梅妝欲試芳情懶翠鬢愁入眉彎霧蟬香
冷霞綃淚搵恨襲湘蘭 悄悄池臺步晚任紅曛杏
靨碧沁苔痕燕子未來東風無語又黃昏琴心不度
春雲遠斷腸難託啼鶂夜深猶倚垂楊二十四欄

醉江月賦水仙

珍做宋版印

漢江露冷是誰將瑤瑟彈向雲中一曲清泠聲漸杳
月高人在珠宮暈額黃輕塗腮粉艷羅帶織青葱天
香吹散珮環猶自丁東回首杜若汀洲金鈿玉鏡
何日得相逢獨立飄飄烟浪遠羅襪羞濺春紅渺渺
予懷迢迢良夜三十六陂風九疑何處斷魂飛度千
峯

又

霽空虹雨傍啼蜚莎草宿鷺汀洲隔岸人家砧杵急
微寒先到簾鉤步幄塵高征衫酒潤誰暖玉香篝風
燈微暗夜長頻換更籌應是鴈柱調箏鴛梭織錦
付與兩眉愁不似樽前今夜月幾度同上南樓紅葉
無情黃花有恨辜負十分秋歸心如醉夢魂飛趁東
流

清平樂

鳳城春淺寒壓花梢顛有約不來梁上燕十二繡簾
空捲去年共倚秋千今年獨倚闌干誤了海棠時
候不成直待花殘

永遇樂

玉腕籠寒翠欄凭曉鶯調新簧暗水穿苔遊絲度柳

人靜芳晝長雲南歸鴈樓西飛燕去來慣認炎涼王
孫遠青青草色幾回空斷柔腸 薔薇舊約樽前一
笑等閑辜負年光鬪草庭空拋梭架冷簾外風絮香
傷春情緒惜花時候日斜尚未成妝聞嬉笑誰家女
伴又還採桑

八寶妝

望遠秋平初過雨微茫水滿烟汀亂蒹疎柳猶帶數
點殘螢待月重樓誰共倚信鴻斷續兩三聲夜如何
頓涼驟覺紈扇無情 還思驂鸞素約念鳳簫鴈瑟
取次塵生舊日潘郎雙鬢半已星星琴心錦意暗懶
又爭奈西風吹恨醒屏山冷怕夢魂飛度藍橋不成

綺羅香 秋雨

鴈字蒼寒蛩疏翠冷又是淒涼時候小揭珠簾衣潤
唾花羅縐洗曉鷺獨立衰荷遡歸燕尚棲殘柳想黃
華羞澁東籬斷無新句到重九 孤檠清夢易覺腸
斷唐宮舊曲聲迷官漏滴入愁心秋似玉樓人瘦烟
檻外催落梧桐帶西風亂捎鴛鴦登記畫簾燈影沉沉
共裁春夜韭

探春 蘇堤春曉

上苑烏啼中洲鷺起疎鐘纔度雲窈篆冷香篝燈微

塵幌殘夢猶吟芳草搔首捲簾看認何處六橋烟柳
翠橈纔纔西泠趁取過湖人少 掠水風花繚繞還
暗憶年時旗亭歌酒隱約春聲鈿車寶勒次第鳳城
開了惟有踏青心縱早起不嫌寒峭畫欄閑立東風
舊紅誰掃

秋霽平湖秋月

千頃玻璃送遠目斜陽漸下林闌題葉人歸採菱舟
散望中水天一色碾空桂魄玉繩低轉雲無迹有素
鷗閑伴夜深呼棹過環碧 相思萬里頓隔嬋媛幾
回瑤臺同駐鸞翼對西風憑誰問取人間那得有今
夕應笑廣寒宮殿窄露冷烟澹還看數點殘星兩行
新鴈倚樓橫笛

百字令 斷橋殘雪

凝雲沍曉正蘼花纔積荻絮初殘華表翩躚何處鶴
愛吟人正孤山凍解苔鋪水融莎豨誰凭玉勾闌茸
衫氎帽冷香吹上吟鞭 將次柳際瓊消梅邊粉瘦
添做十分寒閑踏輕澌來薦菰半潭新漲微瀾水北
峯巒城陰樓觀留向月中看巘雲深處好風飛下晴
湍

掃花遊 雷峯落照

數峯蘸碧記載酒紺園柳塘花塢最堪避暑愛蓮香
送晚翠嬌紅嫵欸乃菱歌乍起蘭橈競舉日斜處望
孤鶩斷霞初下芳杜遙想山寺古看倒影金輪遡
光朱戶暝烟帶樹有投林鷺宿凭樓僧語可惜流年
付與朝鐘暮鼓謾凝竚步長橋月明歸去

驀山溪 花港觀魚

春波浮綠小隱桃溪路烟雨正林塘翠不礙錦鱗來
去芹香藻膩偏愛鯉花肥簷影下柳陰中逐浪吹萍
絮宮溝泉滑怕有題紅句釣餌已忘機都付與人
間兒女濠梁興在鷗鷺笑人癡三湘夢五湖心雲水
蒼茫處

齊天樂 南屏晚鐘

赤欄橋畔斜陽外臨江暮山凝紫戲鼓纔停漁榔乍
歇一片芙蓉秋水餘霞散綺正銀鑰停關畫橈催籟
魚板敲殘數聲初入萬松裏坡翁詩夢未老翠微
樓上月曾共誰倚御苑烟花宮斜露草幾度西風彈
指黃昏盡也有眠月閑僧醉香遊子鷺嶺猿啼喚人
吟思起

明月引 和白雲趙宗簿

雨餘芳草碧蕭蕭暗春潮蕩雙橈紫鳳青鸞舊夢帶

文簫綽約珮環風不定雲欲墮六銖香天外飄相
思為誰蘭恨銷渺相魂無處招素紈猶在真真意還
倩誰描舞鏡空懸羞對月明宵鏡裏心心裏月君去
矣舊東風新畫橋

唐多令 吳江道上寄鄭可大

何處是秋風月明霜露中算淒涼未到梧桐曾向垂
虹橋上看有幾樹水邊楓客路怕相逢酒濃愁更
濃數歸期猶是初冬欲寄相思無好句聊折贈鴈來
紅

又

休去採芙蓉秋江烟水空帶斜陽一片征鴻欲頓閑
愁無頓處都著在兩眉峯心事寄題紅畫橋流水
東斷腸人無奈秋濃回首層樓歸去爛早新月挂梧
桐

戀繡衾

細桃紅淺柳褪黃燕初來宮漏漸長任日轉花梢也
倚蘭屏猶未試妝秦鸞舊曲無心理憶年時相傍
採桑聽綠樹嬌鶯轉一聲聲都是斷腸

又

銀鴛金鳳畫暗銷曉簾櫳新翠漸交算多少相思恨

被東風吹上柳梢 羅窗夜夜梨花瘦 奈月明香夢
易遙 便擬倩題紅句 趁落花流過謝橋

小重山

岸柳黃深綠 漸饒林塘初雨 過漲蒲萄秋 千亭樹彩
旗交鶯聲裏 春在杏花梢 慵整翠雲翹 眉尖愁兩
點 倩誰描 斜陽芳草 暗魂銷 東風遠 猶凭赤欄橋

慶春宮

斜日明霞殘 虹分雨軟 風淺掠蘋波 聲冷瑤笙 情疎
寶扇 酒醒無奈 秋何彩雲輕散 漫敲缺銅壺 浩歌眉
痕 留怨 依約遙峯 學斂雙蛾 銀牀露洗 涼柯屏掩
香銷 忍掃 裊羅楚驛 梅邊吳江 楓畔庾郎 從此愁多
草蛩喧砌 料催織 回文鳳梭 相思遼遠 簾卷翠樓 月
冷星河

垂楊懷古

銀屏夢覺 漸淺黃嫩 綠一聲鶯 小細雨 輕塵建章初
閉 東風悄 依然千樹 長安道 翠雲鎖 玉窗深 窈斷橋
人空倚 斜陽帶舊 愁多少 還是清明 過了 任烟縷
露條 碧纖青 嫩恨隔天涯 幾回惆悵 蘇堤曉 飛花滿
地 誰爲掃 甚薄倖 隨波縹緲 啼鴉不喚 春歸人自老

周

密字

公謹濟南人 僑居吳興 自號弁陽嘯翁

譜

大聖樂東園餞春

嬌綠迷雲倦紅顰曉嫩晴芳樹漸午陰簾影移香燕
語夢回千點碧桃吹雨冷落錦衾歸後記前度蘭橈
停翠浦凭欄久謾凝竚鳳翹慵聽金縷 留春問誰
最苦奈花自無言鶯自語對畫樓殘照東風吹遠天
涯何許怕折露條愁輕別更烟暝長亭啼杜宇垂楊
晚但羅袖晴沾飛絮

花犯水仙花

楚江湄湘娥乍見無言灑清淚淡然春意空獨倚東
風芳思誰記凌波路冷秋無際香雲隨步起謾記漢
宮仙掌亭亭明月底 冰絃寫怨更多情騷人恨枉
賦芳蘭幽芷春思遠誰賞國香風味相將共歲寒伴
侶小窗淨沉烟熏翠被幽夢覺涓涓清露一枝燈影
裏

探春脩門度歲

綵勝宜春翠盤消夜客裏暗驚時候剪燕心情呼盧
音語景物總成懷舊愁鬢如垂楊早穉眼漸濃如豆
儘教寬盡春衫畢竟為誰消瘦 梅浪半空如繡便

管領芳菲忍辜辜詩酒映竹占花臨窗卜鏡還念歲寒
宮袖簫鼓動春城競點綴玉梅金柳廝勾元宵燈前
共誰攜手

瑤花 瓊花

朱鈿寶玦天上飛瓊比人間春別江南江北曾未見
謾擬梨雲梅雪淮山春晚問誰識芳心高潔消幾番
花落花開老了玉鬪豪傑 金壺剪送瓊枝看一騎
紅塵香度瑤闕韶華正好應自喜初識長安蜂蝶杜
郎老矣想舊事花須能說記少年一夢揚州二十四
橋明月

玉京秋

烟水闊高林弄殘照晚蜩淒切碧砧度韻銀牀飄葉
衣濕桐陰露冷採涼花時賦秋雪難輕別一襟幽事
砌蛩能說 客思吟商還怯怨歌長瓊壺暗缺翠扇
疎紅衣香褪翻成銷歇玉骨西風恨最恨閑却新涼
時節楚簫咽誰倚西樓淡月

解語花

晴絲罥蜨煖蜜酣蜂重簾卷春寂寂雨萼烟梢壓闌
干花雨染衣紅濕金鞍誤約空極目天涯草色闌苑
玉簫人去後惟有鶯知得 餘寒猶掩翠戶梁燕乍

歸芳信未端的淺薄東風莫因循輕把杏鈿狼籍塵
侵錦瑟殘日紅窗春夢窄睡起折枝無意緒斜倚秋
千立

曲遊春遊西湖

禁苑東風外颺暖絲晴絮春思如織燕約鶯期惱芳
情偏在翠深紅隙漠漠香塵隔沸十里亂絲叢笛看
畫船盡入西泠閑却半湖春色柳陌新烟凝碧映
簾底宮眉堤上游勒輕暝籠烟怕梨雲夢冷杏香愁
冪歌管酬寒食奈蜨怨良宵岑寂正恁醉月搖花怎
生去得

秋霽秋日游西湖

重到西泠記芳園載酒畫舸橫笛水曲芙蓉渚邊鷗
鷺依依似舊相識年華易失段橋幾換垂楊色謾自
惜愁損庾郎雙鬢點華白殘蛩露草怨蜨飛花轉
眼西風又陳迹歎如今才消量減樽前辜負醉吟筆
欲寄遠情秋水隔舊遊空在凭高望極斜陽亂山浮
紫暮雲凝碧

臺城路梅

宮簷融暖晨妝懶輕霞未勻酥臉倚竹嬌鬢臨溪瘦
影依約樽前重見盈盈笑靨映珠絡玲瓏翠綃葱蒨

夢入羅浮滿衣清露暗香染 東風千樹易老怕紅
顏旋減芳意偷變贈遠天寒吟香夜永多少江南新
怨瓊梳靜掩任剪雪裁雲競誇輕艷畫角黃昏夢隨
春去遠

又

東風又入江南岸年年漢宮春早寶屑無痕生香有
韻消得何郎花惱孤山夢繞記路隔金沙那回曾到
夜月相思翠樽誰共飲香醪 天寒宮怨贈遠水邊
憑爲問春到多少竹外凝情牆陰照影誰見嫣然一
笑冷香未了怕玉管西樓一聲霜曉花自多情看花
人自老

又赤壁重遊

清溪數點芙蓉雨蘋蘩涼泛吟鷓洗玉空明浮珠沆
瀣人靜籟沉波息仙潢咫尺想翠羽瓊樓有人相憶
天上人間未知今夕是何夕 此生此夜此景自仙
翁去後清致誰識散髮吟商簪花弄水誰伴空江橫
笛流年暗惜怕一度西風井梧吹碧底事閒愁醉歌
浮大白

又

曲屏遮斷行雲路西樓怕聽疎雨硯凍凝華香寒散

霧呵筆慵題詩句長安倦旅歎衣染塵痕鏡添秋縷
過盡飛鴻錦箋誰與寄愁去 簫臺應是怨別曉寒
梳洗懶依舊眉嫵酒滴爐香花圍坐暖閑却珠鞦鈿
柱芳心謾語恨柳外遊韉繫情何許暗卜歸期細將
梅蕊數

又蟬

槐陰忽送清商怨依稀正聞還歇寫怨聲長危絃調
苦前夢蛻痕枯葉傷情惜別是幾度斜陽幾回殘月
轉眼西風一襟幽恨向誰說 輕鬟猶記動影翠蛾
應如我雙鬢如雪枝冷頻移葉疎猶抱肯負好秋時
節淒淒切切漸迤邐黃昏砌蛩相接露洗餘悲暮烟
聲更咽

一枝春 酒邊聞歌和韻

淡碧春姿柳眠醒似怯朝來疎雨芳程乍數喚起探
花情緒東風尚淺甚先有翠嬌紅嫵應自把羅綺圍
春占得畫屏春聚 留連繡叢深處愛歌雲裊裊低
隨香縷瓊窗夜暖試與細評新譜妝眉媚粉料無奈
弄鬢佯如還只怕簾外籠鶯笑人醉語

又春晚和韻

簾影移陰杏癩寒乍濕西園絲雨芳期暗數又是去

年心緒金花謾剪倩誰畫舊時眉嫵空自傷楊柳風
流淚滴軟綃紅聚 羅窗那回歌處歎庭花倦舞香
銷冰縷樓空燕冷碎錦懶尋底譜么絃謾賦曾記是
倚嬌成如深院悄門掩梨花倩鶯寄語

綠蓋舞風輕白蓮

玉立照新妝翠蓋亭亭凌波步秋漪真色生香明璫
搖淡月舞袖斜倚耿耿芳心奈千縷晴絲縈繫恨閒
遲不嫁東風颺怨嬌羞 花底謾卜幽期素手採珠
房粉艷初洗雨濕鉛腮碧雲深暗聚軟綃清淚訪藕
尋蓮楚江遠相思誰寄棹歌回衣露滿身花氣

玲瓏四犯戲調夢窗

波暖塵香正嫩日輕陰搖蕩清晝幾日新晴初展綺
窗紋繡年少忍負才華儘占斷艷歌芳酒奈翠簾蜨
舞蜂喧催趁禁烟時候 杏腮紅透梅鈿皺燕歸時
海棠廝勾尋芳較晚東風約還約劉郎歸後憑問柳
陌情人比似垂楊誰瘦倚畫欄無語春恨遠頻回首

拜星月春暮寄夢窗

膩葉陰清孤花香冷迤邐芳洲春換薄酒孤吟悵相
如遊倦想人在絮幕香簾凝望誤認幾許烟檣風幔
芳草天涯負華堂雙燕 記簫聲淡月梨花院研箋

紅謾寫東風怨一夜花落鶻啼喚四橋吟伴蕩歸心
已過江南岸清宵夢遠逐飛花亂幾千萬絲縷垂楊
繫春愁不斷

長亭怨慢

記千竹萬荷深處綠淨池臺翠涼亭宇醉墨題香閑
簫橫玉晝吟趣勝流星聚知幾誦燕臺句零落碧雲
空歎轉眼歲華如許凝佇望涓涓一水夢到隔花
窗戶十年舊事儘消得庾郎愁賦燕樓鶴表半飄零
算惟有盟鷗堪語慢倚遍河橋一片涼雲吹雨

宴清都雷川圖

老去閑情懶東風外霏霏花絮零亂輕鷗漲綠啼鶻
暗碧一春過半尋芳已是來遲怕迤邐年華暗換還
應恨白雪歌空秋霜鬢冷難管凭欄自笑清狂事
隨花謝愁與春緩持盃顧曲登樓賦筆杜郎才減前
歡已隔前溪但耿耿臨高望眼遡輕紅一棹歸時半
蟾弄晚

霓裳中序第一

相屏展翠疊恨入宮溝流怨葉缸冷金花暗結又鴈
影帶霜蛩音淒月珠寬腕雪歎錦箋芳字盈篋人何
在玉簫舊約忍對素娥說愁絕衣砧幽咽任帳底

沉烟漸滅紅蘭誰採贈別悵洛浦分綃漢臯遺玦舞
鸞光半缺最怕聽離絃乍闕憑欄久一庭香露桂影
弄淒蛻

惜餘春慢 避暑和韻

紺玉波寬碧雲亭小冉冉水花香細魚牽翠帶燕掠
紅衣兩窗萬荷荷喧睡臨檻自採瑤房鉛粉沾襟雪絲
縈指喜嘶蟬樹遠盟鷗鄉近鏡奩光裏 簾戶悄竹
色侵棋槐陰移漏晷永簾花鋪水清眠乍足晚浴初
慵瘦約楚裙尺二曲砌虛庭夜深月透龜紗涼生蟬
翅看銀潢瀉露金井鴉啼漸起

祝英臺近 攬秀園

倚玲瓏尋窈窕瑤草四時碧小小蓬萊花氣透簾隙
幾回翠水荷初蒼崖梅小綺寮掩玉壺春色 柳屏
窄芳檻日日東風幾陣吹吟筆曲折花房鶯燕似曾
識最憐燈影纔收歌塵初靜畫樓外一聲秋笛

又石溪次韻日熙堂主人

擘餘醒尋舊雨愁與病相半綠意陰陰絲竹靜深院
絕憐事逐春移淚隨花落似剪斷蚊房珠串 喜重
見爲誰倦酒慵詩貧屏掩雙扇白髮潘郎羞見看花
伴可堪好夢殘時新愁生處烟月冷子規聲斷

徵招九日有懷楊守齋

江籬搖落江楓冷霜空鴈程初到萬景正悲秋奈曲
終人杳登臨嗟老矣問古今清愁多少一夢東園十
年心事恍然驚覺 腸斷紫霞深知音遠寂寂怨琴
淒調短髮已無多怕西風吹帽黃花空自好問誰識
對花懷抱楚山遠九辨難招更晚烟殘照

聲聲慢柳花

燕泥沾粉魚浪吹香芳堤十里新晴靜惹遊絲花邊
裊裊扶春多憐漂泊泊記章臺曾挽青青堪愛處是撲
簾嬌嫩隨馬輕盈 長是河橋三月做一番晴雪惱
亂詩魂帶雨沾衣羅襟點點離痕休綴潘郎鬢影怕
綠窗年少人驚卷春去剪東風千縷碎雲

又送王聖與次韻

瓊壺敲月白髮簪花十年一夢揚州恨入琵琶小憐
重見灣頭樽前漫題金縷奈芳情已逐東流還送遠
甚長安亂葉都是閑愁 次第重陽近也看黃花綠
酒只合遲留脆柳無情不堪重繫行舟百年正消幾
別對西風休賦登樓怎去得怕淒涼時節團扇悲秋
醉落魄 洪魯仲之江西書以爲別

寒侵徑葉鴈風擊碎珊瑚屑硯涼閑試霜晴帖頌菊

騷蘭秋事正奇絕 故人又作江西別書樓虛度中
秋節碧欄倚遍誰人說愁是新愁月是舊時月

水龍吟

燕翎誰寄愁箋天涯極望王孫草新烟換柳光風浮
蕙餘寒尚峭倚杖看雲剪燈聽雨幾番詩酒歎長安
倦客江南舊恨飛花亂清明後 堤上斜陽風驟散
香綿輕沾吟袖麴塵兩岸紋波十里暖蒸香透海闊
雲深水流春遠夢魂難勾問鶯邊按譜花前覓句解
相思否

又

舞紅輕帶愁飛寶鞮暗憶章臺路吟香醉雨吹簫門
巷飄梭院宇立盡殘陽眼迷晴樹夢隨風絮歎江潭
冷落依依舊恨人空老柳如許 錦瑟年華暗度賦
行雲空題短句晴絲繫燕么絃彈鳳文君更苦烟水
流紅暮雲凝紫是春歸處悵江南望遠蘋花自採寄
將愁與

又白蓮

素鸞飛下青冥舞衣半惹涼雲碎藍田種玉綠房迎
曉一奩秋意擎露盤深憶君涼夜暗傾鉛水想鴛鴦
正結梨雲好夢西風冷還驚起 應是飛瓊仙會倚

涼颺碧簪斜墜輕妝鬪白明璫照影紅衣羞避霽月
三更粉香千點靜聞十里聽湘絃奏徹冰綃偷剪聚
相思淚

天香龍涎香

碧腦浮冰紅薇染露驪宮玉唾誰搗麝月雙心鳳雲
百和寶釧珮環爭巧濃熏殘炷疑醉度千花春曉金
餅著衣餘潤銀葉透簾微裊素被瓊篝夜悄酒初
醒翠屏深宵一縷舊情空趁斷烟飛繞羅袖餘馨漸
少悵東閣淒涼夢難到誰念韓郎清愁漸老

珍珠簾琉璃簾

寶堦斜轉春宵翳雲屏敞霞卷東風新霽光照萬星
寒曳冷雲垂地暗憶連昌遊冶事照炫轉熒煌珠翠
難比是鮫人織就冰綃清淚猶記夢入瑤臺正玲
瓏透月瓊扉十二細縷逗濃香接翠蓬雲氣縞夜梨
花生煖白浸瀲灩一池春水乘醉恍歸時人在明河
影裏

疎影梅影

冰條凍葉又橫斜照水一花初發素壁秋屏招得芳
魂彷彿玉容明滅疎疎滿地珊瑚冷全誤却撲花幽
蝶甚美人忽到窗前鏡裏好春難折閑想孤山舊

事浸清漪倒映千樹殘雪暗裏東風可慣無情攪碎
一簾香月輕妝誰寫崔徽面認隱約烟綃重疊記夢
回紙帳殘燈瘦倚數枝清絕

玉漏遲 題吳夢窗窗霜花腴詞集

老來歡意少錦鯨去紫簫聲杳怕展金奩依舊故人
懷抱猶想烏絲醉墨驚醉語香紅圍繞閑自笑與君
共是承平年少 雨窗短夢難憑是幾調宮商幾番
吟嘯淚眼東風回首四橋烟草載酒倦遊處已換却
花間啼鳥春恨悄天涯暮雲殘照

南樓令

開了木芙蓉一年秋已空送新愁千里孤鴻搖落江
籬多少恨吟不盡楚雲峯 往事夕陽紅故人江水
東翠衾寒幾夜霜濃夢隔屏山飛不去隨夜鷓繞疎
桐

西江月

波影暖浮玉鬢柳陰深鎖金鋪相桃花褪燕調雛又
是一番春暮 碧柱情深鳳怨雲屏夢淺鶯呼繡窗
人倦冷熏爐簾影搖搖亭午

又茶蘼閣

花氣半侵雲閣柳陰近隔春城畫欄明月按瑤箏醉

倚滿身花影 翠格素虬晴雪錦籠紫鳳香雲東風
吹玉滿閑亭二十四簾春靜

鷓鴣天清明

燕子時時度翠簾柳寒猶未透香綿落花門巷家家
雨新火樓臺處處烟 情默默恨懨懨東風吹動畫
秋千刺桐開盡聲聲鳥無奈春風祇醉眠

又

相傍清明晴更慳閉門空自惜花殘海棠半坼難禁
雨燕子初歸不奈寒 金鴨冷錦鴛閑銀缸空照小
屏山翠羅袖薄東風悄獨倚西樓第幾欄

夜行船

寒菊淒風棲小蝶簾櫳靜半規涼月夢不分明恨無
憑據腸斷錦箋盈篋 哀角吹霜寒正怯倚瑤箏暗
愁難說寶獸頻添玉蟲暗剪長記舊家時節

杏花天

瑞雲盤翠侵宮額眉柳嫩不禁愁積返魂誰染東風
筆寫出郢中春色 人去後垂楊自碧歌舞夢欲尋
無迹愁隨兩槩江南北日暮石城風急

又昭君

漢宮乍出慵梳掠關月冷玉沙飛幕龍香撥指春風

弱一曲哀絃謾托 君恩薄空憐命薄青塚遠幾番
花落丹青自是難描摸不是當時畫錯

又

金池瓊苑曾經醉是少紅情綠意東風一枕遊仙
睡換却鶯花人世 漸暮色鶻聲四起正愁滿香溝
御水一色柳烟三十里爲問春歸那裏

浪淘沙

芳草碧茸茸染恨無窮一春心事雨聲中窄素宮羅
寒尚峭閑倚熏籠 猶記粉牆東同醉香叢金鞍何
處驟花驄裊裊綠窗殘夢斷紅杏東風

點絳脣南漪釣隱牟存叟

午夢初回卷簾盡放春愁去晝長無侶自對黃鸝語
絮影蘋香春在無人處移舟去未成新句一硯梨
花雨

謁金門

花不定燕尾剪開紅影幾點落英蜂翅趁日遲簾幕
靜 試把翠蛾輕暈愁薄寶臺鸞鏡屈指一春將次
盡歸期猶未穩

又吳山觀濤

天水碧染就一江秋色鰲戴雪山龍起蟄快風吹海

立 數點烟鬟青滴 一杼霞綃紅濕白鳥明邊帆影
直隔江聞夜笛

又

芳事晚數點杏鈿香淺惻惻輕寒風剪剪錦屏春夢
遠 穉柳拖烟嬌軟花影暗藏深院初試輕衫并畫
扇牡丹紅未展

清平樂

曉鶯嬌咽庭戶溶溶月一樹湘桃飛茜雪紅豆相思
漸結 看看芳草平沙遊韉猶未歸家自是蕭郎漂
泊錯教人恨楊花

鳳棲梧 梧生香亭

竹杏花深連別墅曲曲回廊小小閑庭宇忽地香來
無覓處杖藜閑趁遊蜂去 老桂凝秋森玉樹澗底
孤芳冉冉吹詩句一掬幽情知幾許鈎簾半畝藤花
雨

少年遊 宮詞擬小山

簾銷寶篆捲宮羅蜂蝶撲飛梭一樣春風燕梁鶯戶
那處得春多 曉妝日日隨春輦多在牡丹坡花深
深處柳陰陰處一片笙歌

甘州 燈夕寄二隱

漸淒淒芳草綠江南輕暉弄春容記少年遊處簫聲
巷陌燈影簾櫳月暖烘鑪戲鼓十里步香紅敲枕聽
新雨往事朦朧還是春江夢曉怕等閑愁見鴈影
西東喜故人好在水驛寄詩筒數芳程漸催花信送
歸帆知第幾番風空吟想梅花千樹人在其中

一萼紅登蓬萊閣有感

步深幽正雲黃天淡雪意未全休鑑曲寒沙茂林烟
草俛仰今古悠悠歲華晚飄零漸遠誰念我同載五
湖舟磴古松斜厓陰苔老一片清愁回首天涯歸
夢幾魂飛西浦淚灑東州故國山川故園心眼還似
王粲登樓最負他秦鬟妝鏡好江山何事此時遊爲
喚狂吟老監共賦銷憂

詞綜卷二十

前錄卷二十一

與王公大臣共勉

王公大臣共勉

王公大臣共勉

王公大臣共勉

王公大臣共勉

王公大臣共勉

王公大臣共勉

王公大臣共勉

王公大臣共勉

王公大臣共勉

王公大臣共勉

詞綜卷二十一

宋詞七十首

王沂孫三十一首

張炎三十九首

王沂孫字聖與號碧山又號中仙會稽人有碧山

樂府二卷一名花外集

天香龍涎香

孤嶠蟠烟層濤蛻月驪宮夜採鉛水訊遠槎風夢深
薇露化作斷魂心字紅蕚候火還乍識冰環玉指一
縷榮簾翠影依稀海天雲氣幾回殢嬌半醉翦春
燈夜寒花碎更好故溪飛雪小窗深閉荀令如今頓
老總忘却樽前舊風味謾惜餘熏空篝素被

南浦春水

柳下碧粼粼認麴塵乍生色嫩如染清溜滿銀塘東
風細參差縠紋初遍別君南浦翠眉曾照波痕淺再
來漲綠迷舊處添却殘紅幾片蒲萄過雨新痕正
拍拍輕鷗翩翩小燕簾影蘸樓陰芳流去應有淚珠
千點滄浪一舸斷魂重唱蘋花怨采香幽徑鴛鴦睡
誰道滌裙人遠

又前題

柳外碧連天漾翠紋漸平低蘸雲影應是雪初消巴

山路蛾眉乍窺清鏡綠痕無際幾番飄蕩江南恨弄
波素韞知甚處空把落紅流盡 何時橘里尊鄉泛
一舸翩然東風歸興孤夢遶滄浪蘋花漠漠雨昏烟
暝連筒接縷故溪深掩柴門靜只愁雙燕銜春去拂
破藍光千頃

花犯 苔梅

古蟬娟蒼鬢素靨盈盈瞰流水斷魂十里歎紺縷飄
零難繫離思故山歲晚誰堪寄琅玕聊自倚謾記我
綠萼衝雪孤舟寒浪裏 三花兩蕊破蒙茸依依似
有恨明珠輕委雲臥穩藍衣正護春顛額羅浮夢半
蟾挂曉 玄鳳冷山中人乍起又喚取玉奴歸去餘香
空翠被

露華 碧桃

紺葩乍坼笑爛熳嬌紅不是春色換了素妝重把青
螺輕拂舊歌共渡烟江却占玉奴標格風霜峭瑤臺
種時付與仙骨 閑門晝掩淒惻似淡月梨花重化
清魄尚帶唾痕香凝怎忍攀摘嫩綠漸暖溪陰簌簌
粉雲飛出芳艷冷劉郎未應認得

無悶 雪意

陰積龍荒寒度鴈門西北高樓獨倚悵短景無多亂

山如此欲喚飛瓊起舞怕攪碎紛紛銀河水凍雲一片藏花護玉未教輕墜
清致悄無似有照水南枝已攬春意誤幾度憑欄莫愁凝睇應是梨花夢好未肯放東風來人世待翠管吹破蒼茫看取玉壺天地
眉嫵新月

漸新痕懸柳澹彩穿花依約破初暝便有團圓意深深拜相逢誰在香逕畫眉未穩料素娥猶帶離恨最堪愛一曲銀鈎小寶簾挂秋冷
千古盈虧休問歎謾磨玉斧難補金鏡太液池猶在淒涼處何人重賦清景故山夜永試待他窺戶端正看雲外山河還老
桂花舊影

水龍吟 牡丹

曉寒慵揭珠簾牡丹院落花開未玉闌干畔柳絲一把和風半倚國色微酣天香乍染扶春不起自真妃舞罷謫仙賦後繁華夢如流水
池館家家芳事記當時買栽無地爭如一朵幽人獨對水邊竹際把酒花前剩撿醉了醒來還醉怕洛中春色匆匆又入杜鵑聲裏

又海棠

世間無此傳停玉環未破東風睡將開半斂似紅還

白餘花怎比偏占年華禁烟纔過夾衣初試歎黃州
一夢燕宮絕筆無人解看花意 猶記花陰同醉小
闌干月高人起千枝媚色一庭芳景清寒似水銀燭
延嬌綠房留艷夜深花底怕明朝小雨濛濛便化作
燕支淚

又落葉

曉霜初著青林望中故國淒涼早蕭蕭漸積紛紛猶
墜門荒徑悄渭水風生洞庭波起幾番秋杪想重崖
半沒千峯盡出山中路無人到 前度題紅杳杳遡
宮溝暗流空遶啼蜚未歇飛鴻欲過此時懷抱亂影
翻窗碎聲敲砌愁人多少望吾廬甚處只應今夜滿
庭誰掃

綺羅香

屋角疎星庭陰暗水猶記藏鴉新樹試折梨花行入
小欄深處聽粉片簌簌飄堦有人在夜窗無語料如
今門掩孤燈畫屏塵滿斷腸句 佳期渾似流水還
見梧桐幾葉輕敲朱戶一片愁聲應做兩邊愁緒江
路遠歸鴈無憑寫繡箋倩誰將去謾無聊猶掩芳樽
醉聽深夜雨

齊天樂

碧痕初化池塘草
熒熒野光相趁扇
薄星流盤明露
滴零落秋原飛
燐練裳暗近記
穿柳生涼度荷
分暝誤我殘編翠
囊空歎夢無準
樓陰時過數點
倚欄人未睡曾
賦幽恨漢苑飄
苔秦陵墜葉千
古淒涼不盡何
人爲省但隔水
餘輝傍林殘影
已覺蕭疎更堪
秋夜永

又蟬

綠槐千樹西窗悄
厭厭晝眠驚睡
飲露身輕吟風
翅薄半翦冰箋
誰寄淒涼倦耳
謾重拂琴絲怕
尋冠珥短夢深
宮向人猶自訴
憔悴殘紅收盡
過雨晚來頻斷
續都是秋意病
葉難留纖柯易
老空憶斜陽身
世窗明月碎甚
已絕餘音尚遺
枯蛻鬢影參差
斷魂清鏡裏

又前題

一襟餘恨宮魂斷
年年翠陰庭樹
乍咽涼柯還移
暗葉重把離愁
深訴西窗過雨
怪瑤珮流空玉
箏調柱鏡暗妝
殘爲誰嬌鬢尚
如許銅仙鉛淚
似洗歎移盤去
遠難貯零露病
翼驚秋枯形閱
世消得斜陽幾
度餘音更苦甚
獨抱清商頓成
淒楚謾想薰風
柳絲千萬縷

又贈秋厓道人西歸

冷烟殘水山陰道家擁門黃葉故里魚肥初寒鴈
落孤艇將歸時節江南恨切問還與何人共歌新闋
換盡秋芳想渠西子更愁絕 當時無限舊事歎繁
華似夢如今休說短褐臨流幽懷倚石山色重逢都
別江雲凍結算只有梅花尚堪攀折寄取相思一枝
和夜雪

三姝媚 次周公謹故京送別韻

蘭缸花半綻正西窗淒淒斷螢新鴈別久逢稀謾相
看華髮共成銷黯總是飄零更休賦梨花秋苑何況
如今離思難禁俊才都減 今夜山高江淺又月落
帆空酒醒人遠彩袖烏絲解愁人惟有斷歌幽婉一
信東風再約看紅腮青眼只恐扁舟西去蘋花弄晚

又櫻桃

紅櫻懸翠葆漸金鈴枝深瑤堦花少萬顆燕支贈舊
情爭奈弄珠人老扇底清歌還記得樊姬嬌小幾度
相思紅豆都銷碧絲空裊 芳意荼蘼開早正夜色
瑛盤素蟾低照薦筍同時歎故園春事已無多了貯
滿筠籠偏暗觸天涯懷抱謾想青衣初見花陰夢好

慶清朝 榴花

玉局歌殘金陵句絕年年負却薰風西鄰窈窕獨憐
入戶飛紅前度綠陰載酒枝頭色比似裙同何須擬
蠟珠作蒂湘彩成叢誰在舊家殿閣自太真仙去
掃地春空朱旛護取如今應誤花工顛倒絳英滿徑
想無車馬到山中西風後尚餘數點還勝春濃

高陽臺

淺萼梅酸新溝水綠初晴節序暄妍獨立雕欄誰憐
枉度華年朝朝準擬清明近料燕翎須寄銀箋又爭
知一字相思不到吟邊雙蛾不拂青鸞冷任花陰
寂寂掩戶閑眠屢卜佳期無憑却恨金錢何人寄與
天涯信趁東風急整歸鞭縱飄零滿院楊花猶是春
前

又西麓陳君衡遠遊未還周公謹有懷人之賦
倚其歌而和之

駝褐輕裝狨鞵小隊冰河夜渡流澌朔雪平沙飛花
亂拂蛾眉琵琶已是淒涼調更賦情不比當時想如
今人在龍庭初勸金卮一枝芳信應難寄向山邊
水際獨抱相思江鴈孤回天涯人自歸遲歸來依舊
秦淮碧問此愁還有誰知對東風空似垂楊零亂千
絲

又

殘雪庭陰輕寒簾影霏霏玉管春葭小帖金泥不知
春是誰家相思一夜窗前夢奈個人水隔天遮但淒
然滿樹幽香滿地橫斜江南自是離愁苦况游聽
古道歸鴈平沙怎得銀箋殷勤與說年華如今處處
生芳草縱凭高不見天涯更消他幾度東風幾度飛
花

掃花游 秋聲

商飈乍發漸浙浙初聞蕭蕭還住頓驚倦旅背青燈
弔影起吟愁賦斷續無憑試立荒庭聽取在何許但
落葉滿堦惟有高樹 迢遞歸夢阻正老耳難禁病
懷淒楚故山院宇想邊鴻孤唳砌蛩私語數點相和
更著蕉蕉細雨避無處這閑愁夜深尤苦

又 綠陰

小庭蔭碧遇驟雨疎風剩紅如掃翠交徑小問攀條
弄蕊有誰重到謾說青青比似花時更好怎知道一
別漢南遺恨多少 清晝人悄悄任密護簾寒暗迷
窗曉舊盟誤了又新枝嫩子總隨春老漸隔相思極
目長亭路杳攪懷抱聽蒙茸數聲啼鳥

又

捲簾翠濕過幾陣殘寒幾番風雨問春住否但匆匆
暗裏換將花去亂碧迷人總是江南舊樹謾疑竚念
昔日采香人更何許芳徑攜酒處又蔭得青青嫩
苔無數故林晚步想參差漸滿野塘山路倦枕閑牀
正好微曛院宇送淒楚怕涼聲又催秋暮

又

滿庭嫩碧漸密葉迷窗亂枝交路斷紅任處但匆匆
換得翠痕無數暗影沉沉靜鎖清和院宇試凝佇怕
一點舊香猶在幽樹濃陰知幾許且拂簟清眠引
筇閑步杜郎老去算尋芳較晚倦懷難賦縱勝花時
到了愁風怨雨短亭暮謾青青怎遮春去

瑣窗寒

趁酒梨花催詩柳絮一窗春怨疎疎過雨洗盡滿堦
芳片數東風二十四番幾番誤了西園宴認小簾朱
戶不如飛去舊巢雙燕曾見雙蛾淺自別後多應
黛痕不展撲蝶花陰怕看題詩團扇試憑他流水寄
情遶紅不到春更遠但無聊病酒厭厭夜月荼蘼院

又春寒

料峭東風廉纖細雨落梅飛盡單衣惻惻再整金猊
香燼誤千紅試妝較遲故園不似清明近但滿庭柳

色柔絲羞舞淡黃猶凝芳景還重省向薄晚窺簾
嫩陰欹枕桐花漸老已做一番風信又看看綠遍西
湖早催塞北歸鴈影等歸時爲帶春歸併帶江南恨
應天長

疎簾蜨粉幽徑燕泥花間小雨初足又是禁城寒食
輕舟泛晴綠尋芳地來去熟尚彷彿大堤南北望楊
柳一片陰陰搖曳新綠重訪艷歌人聽取春聲猶
是杜郎曲蕩漾去年春色深深杏花屋東風曾共宿
記小刻近窗新竹舊游遠沉醉歸來滿院銀燭

摸魚兒

洗芳林夜來風雨匆匆還送春去方纔送得春歸了
那又送君南浦君聽取怕此際春歸也過吳中路君
行到處便快折河邊千條翠柳爲我繫春住春還
住休索吟春伴侶殘花今已塵土姑蘇臺下烟波遠
西子近來何許能喚否又只恐殘春到了無憑據煩
君妙語更爲我且將春連花帶柳寫入翠箋句

聲聲慢

啼螿門靜落葉堆深秋聲又入吾廬一枕新涼西窗
晚雨疎疎舊香舊色換却但滿川殘柳荒蒲茂陵遠
任歲華苒苒老盡相如昨夜西風初起想萼邊呼

擢橋後思書短景淒然殘歌空扣銅壺當時送行共
約鴈歸時人賦歸歟鴈歸也問人歸如鴈也無

望梅

畫欄人寂喜輕盈照水犯寒先坼裊數枝雲縷絞綃
露淺淺塗黃漢宮嬌額翦玉裁冰已占斷江南春色
恨風前素艷雪裏暗香偶成拋擲 如今眼穿故國
待拈花弄藥時話思憶想隴頭依約飄零甚千里芳
心杳無消息粉怯珠愁又只恐吹殘羌笛正斜飛半
窗曉月夢回隴驛

張

炎字叔夏循王俊裔居臨安自號樂笑翁有

玉田詞三卷鄭思肖爲之序

仇仁近云叔夏詞意度超玄律呂協洽當
與白石老仙相鼓吹

南浦 春水

波暖綠鱗鱗燕飛來好是蘇堤纔曉魚沒浪痕圓流
紅去翻喚東風難掃荒橋斷浦柳陰撐出扁舟小回
首池塘青欲遍絕似夢中芳草 和雲流出空山甚
年年淨洗花香不了新綠乍生時孤村路猶憶那回
曾到餘情渺渺茂林鶻詠如今悄前度劉郎歸去後
溪上碧桃多少

水龍吟 白蓮

仙人掌上芙蓉涓涓猶溼金盤露輕妝照水纖裳玉
立飄飄似舞幾度消凝滿湖烟月一汀鷗鷺記小舟
夜悄波明香遠渾不見花開處應是浣紗人如褪
紅衣被誰輕香遠渾不見花開處應是浣紗人如褪
相逢偶然傾蓋似傳心素怕湘臯珮解綠雲十里卷
西風去

解連環 孤鴈

楚江空晚悵離羣萬里恍然驚散自顧影欲下寒塘
正沙淨草枯水平天遠寫不成書只寄得相思一點
歎因循誤了殘氈擁雪故人心眼誰憐旅愁荏苒
謾長門夜悄錦箏彈怨想伴侶猶宿蘆花也曾念春
前去程應轉暮雨相呼怕驀地玉關重見未羞他雙
燕歸來畫簾半捲

探春 雪霽

銀浦流雲綠房迎曉一抹牆腰月淡暖玉生香懸冰
解凍碎滴瑤階如霰纔放些晴意早瘦了梅花一半
也知不做花香東風何事吹散搖落似成秋苑甚
釀得春來怕教春見野渡舟迴前村門掩應是不勝
清怨次第尋芳去灞橋外蕙香波暖猶如簷聲看燈

人在深院

又歲晚吳中作

列屋烘爐深門響竹催殘客裏時序投老情懷薄游
滋味消得幾回淒楚聽鴈聽風雨更聽過數聲柔櫓
暗將一點歸心試託鄉書分付 試問西樓在否休
忘了盈盈端正窺戶簾卸蟾冰柳縈蛾雪次第滿城
簫鼓閑見誰家月渾不記舊游何處伴我微吟恰有
梅花一樹

高陽臺 西湖春感

接葉巢鶯平波卷絮斷橋斜日歸船能幾番游看花
又是明年東風且伴薔薇住到薔薇春已堪憐更淒
然萬綠西泠一抹荒烟 當年燕子知何處但苔深
韋曲草暗斜川見說新愁如今也到鷗邊無心再續
笙歌夢掩重門淺醉閑眠莫開簾怕見飛花怕聽啼
鶯

掃花遊 春飲殊鄉醉餘偶賦

嫩寒禁暖正草色侵衣野光如洗去城數里遶長堤
是柳釣船如艤小立斜陽試數花風第幾問春意待
留取斷紅心事難寄 芳信成撚指甚遠客他鄉老
懷如此醉餘夢裏尚分明認得舊時羅綺可惜空簾

誤却歸來燕子勝遊地想依然斷橋流水

珍做宋版印

又高疏寮東野園

烟霞萬壑記曲徑尋幽霽痕初曉綠窗窈窕看隨花
盤石就泉通沼幾日不來一片蒼雲未掃自長嘯恨
喬木荒涼都是殘照 碧天秋浩渺聽虛籟泠泠飛
下孤峭山空翠老步仙風怕有采芝人到野色閑門
芳草不除更好境深悄比斜川又清多少

渡江雲久客山陰王菊存問予近作書以寄之

山空天入海倚樓望極風急暮潮初一簾鳩外雨幾
處閑田隔水動春鉏新烟禁柳想如今綠到西湖猶
記得當年深隱門掩兩三株 愁余荒洲古渚斷梗
疎萍更漂流何處空自覺圍羞帶減影怯燈孤長疑
卽見桃花面甚近來翻致無書書縱遠如何夢也都
無

又次趙元甫韻

錦香繚繞地深燈挂壁簾影浪花斜酒船歸去後轉
首河橋那處認紋紗重盟鏡約還記得前度秦嘉惟
只有葉題堪寄流不到天涯 驚嗟十年心事幾曲
闌干想蕭娘聲價閑過了黃昏時候疎柳啼鴉浦潮
夜湧平沙淨問斷鴻知落誰家書又遠空江片月蘆

花

綺羅香紅葉

萬里飛霜千山落木寒艷不招春妒楓冷吳江獨客
又吟愁句正船艤流水孤村似花繞斜陽芳樹甚荒
溝一片淒涼載情不去載愁去長安誰問倦旅羞
見衰顏借酒飄零如許謾倚新妝不入洛陽花譜爲
回風起舞樽前盡化作斷霞千縷記陰陰綠遍江南
夜窗聽暗雨

清平樂

候望淒斷人語西風岸月落沙平江似練望盡蘆花
無鴈暗教愁損蘭成可憐夜夜閑情只有一枝梧
葉不知多少秋聲

疎影梅影

黃昏片月似滿地碎陰還更清絕枝北枝南疑有疑
無幾度背燈難折依稀倩女離魂處緩步出前村時
節看夜深竹外橫斜應妒過雲明滅窺鏡蛾眉淡
掃爲容不在貌獨抱孤潔莫是花光描取春痕不怕
麗譙吹徹還驚海上燃犀去照水底珊瑚疑活做弄
得酒醒天寒空對一庭香雪

邁陂塘

詞

綜

卷二十一

八

中華書局聚

愛吾廬傍湖千頃蒼茫一片清潤晴嵐暖翠融融處
花影倒窺天鏡沙浦迥看野水涵波隔柳橫孤艇眠
鷗未醒甚占得蓴鄉都無人見斜照起春暝 休重
省莫問山中秦晉桃源今度難認林間却是長生路
一笑元非捷徑深更靜待散髮吹簫鶴背天風冷憑
高露飲正碧落塵空光搖半壁月在萬松頂

甘州 錢沈秋江

記玉關踏雪事清遊寒氣做貂裘傍枯林古道長河
飲馬此意悠悠短夢依然江表老淚灑西州一字無
題處落葉都愁 載取白雲歸去問誰留楚珮弄影
中洲折蘆花贈遠零落一身秋向尋常野橋流水待
招來不是舊沙鷗空懷感有斜陽處最怕登樓

月下笛 甬東積翠山舍

萬里孤雲清遊漸遠故人何處寒窗裏曾記經行舊
時路連昌約略無多柳第一是難聽夜雨謾驚回悽
悄相看燭影擁衾誰語 張緒歸何暮冷零落依依
短橋鷗鷺天涯倦旅此時心事良苦只愁重灑西州
淚問杜曲人家在否恐翠袖正天寒猶倚梅花那樹

臺城路 送周方由之吳

朗吟未了西湖酒驚心又歌南浦折柳官橋呼船野

渡還聽垂虹風雨漂流最苦況如此江山此時情緒
怕有鷗夷笑人何事載詩去荒臺祇今在否再休
登望遠都是愁處暗草埋沙明波洗月誰念天涯羈
旅荷陰未暑快料理歸程再盥鷗鷺只有空山近來
無杜宇

又寄太白山人陳又新

薛濤箋上相思字重開又還重摺太白秋聲東瀛柳
色一縷輕痕輕折虛沙動月歎千里悲歌唾壺敲缺
記得巴山此時懷抱那時說寒香深處話別病來
渾瘦損懶賦清切笑裏移春吟邊慨古多少英游消
歇迴潮似咽送一點愁心故人天末江影沉沉夜涼
鷗夢闌

又杭友抵越適鑑曲漁舍會飲

春雲不暖垂楊柳吹却絮雲多少燕子人家夕陽巷
陌行入野畦深窈籌花鬪草記小艇尋芳斷橋初曉
那日心情幾人同向近來老消憂何處最好夜遊
頻秉燭猶是遲了南浦歌闌東林社冷贏得如今懷
抱吟悰暗惱待醉也慵聽勸歸啼鳥怕攢離愁亂紅
休去掃

又庚辰會江蘭坡於薊北恍然如夢回憶舊遊

已十八年矣

珍做宋版印

十年舊事翻疑夢重逢可憐俱老水國春空山城歲
晚無語相看一笑荷衣換了任京洛塵沙冷凝風帽
見說吟情近來不到謝池草歡遊曾步翠窈亂紅
迷紫曲芳意今少舞扇招香歌撓喚玉猶憶錢塘蘇
小無端暗惱又幾度流連燕昏鶯曉回首妝樓甚時
重去好

又爲湖天賦

扁舟忽過蘆花浦閑情便隨鷗去水國吹簫虹橋問
月西子如今何許危闌謾拊正獨立蒼茫半空飛露
倒影虛明洞庭波映廣寒府魚龍吹浪自舞渺然
凌萬頃如聽風雨夜氣浮山晴暉蕩目無尋秋處驚
鳧自語尚記得當時故人來否勝景平分此心遊太
古

真珠簾 近雅軒卽事

雲深別有深庭宇小簾櫳占取芳菲多處花暗曲房
春潤幾番酥雨見說蘇堤晴未穩便好趁踏青人去
休去且料理琴書夸猶今古誰見靜裏閑心縱荷
衣未葺雪巢堪賦醒醉一乾坤任此情如許茂樹石
牀同坐久又却被清風留住欲住奈簾影妝樓翦燈

人語

三姝媚送舒亦山

蒼潭枯海樹正雪竇高寒水聲東去古意蕭閑問結
廬人遠白雲誰侶賀監猶存還散跡千岩風露抱瑟
空游都是淒涼此愁誰語莫趁江湖鷗鷺怕太乙
爐烟暗銷鉛虎投老心情判歸來何事共成羈旅布
襪青鞋休悞入桃源深處待得重逢却說巴山夜雨
憶舊遊新朋故侶醉酒遲留吳山縱橫渺渺兮

予懷也

記開簾送酒隔水懸燈款語梅邊未了清游興又飄
然獨去何處山川淡風暗收榆筴吹下沈郎錢歎客
裏光陰消磨艷冶都在尊前留連住人處是鑑曲
窺鶯蘭沼圍泉醉拂珊瑚樹寫百年幽恨分付吟箋
故舊幾回飛夢江雨夜涼船縱忘却歸期千山未必
無杜鵑

探芳信次周草窗韻

坐清晝正冶思縈花餘醒倦酒甚探芳人老芳心尚
如舊消魂忍說銅駝事不是因春瘦向西園竹掃頽
垣蔓羅荒甃風雨夜來驟歎歌冷鶯簾恨凝蛾岫
愁到今年都似去年否賦情懶聽山陽笛目極空搔

詞

綠卷二十一

十一中華書局聚

首我何堪老却江潭漢柳

梅子黃時雨病中懷歸

流水孤村愛塵事頓消來訪深隱向醉裏誰扶滿身
花影鷗鷺相看如一作鷺相比瘦近來不是傷春病
嗟流景竹外野橋猶繫烟艇誰引斜川歸興便啼
鶻縱少無奈時聽待棹擊空明魚波千頃彈斷琵琶
留不住最愁人是黃昏近江風緊一行柳絲吹暝

瑣窗寒

亂雨敲春深烟帶晚水窗慵凭空簾謾卷數日更無
花影怕依然舊時歸燕定知未識江南冷最憐他樹
底鶯紅不語背人吹盡清澗通幽徑謾移燈剪韭
試温香鼎分吟醉裏過了幾番風信想竹間高閣半
開小車未來猶自等傍新晴隔柳呼船待教潮信穩
又王碧山又號中仙越人也其詩清峭其詞閑

雅有姜白石意趣今絕響矣余悼之

斷碧分山空簾剩月故人天外香留酒滯蝴蝶蜨一生
花裏想如今愁魂正遠夜臺夢語秋聲碎自中仙去
後詞箋賦筆便無清致都是淒涼意悵玉筍埋雲
錦衣歸去形容憔悴料應也孤吟山鬼那知人是彈
折素琴黃金鑄出相思淚但柳枝門掩清陰候蛩愁

暗葦

法曲獻仙音聽琵琶有懷昔游

雲隱山暉樹分溪影未放妝臺簾卷篝密籠香鏡圓
窺粉花深自然寒淺正人在銀屏底琵琶半遮面
語聲軟且休彈玉關愁怨怕喚起西湖那時春感楊
柳古灣頭記小憐心事散入落梅千點
難剪把一襟心事散入落梅千點

西河史元叟依綠莊賞荷

花最盛西湖曾泛烟艇鬧紅深處小秦箏斷橋夜飲
鴛鴦水宿不知寒如今翻被驚醒那時事都倦省
蘭干來此閑凭是誰分得半機雲恍疑晝錦想當年
飛燕皺裙時舞盤微墮珠粉軟波不剪素練靜碧
盈盈移下秋影醉裏玉書難認且脫巾露髮飄然乘
興一葉愁香天風冷

長亭怨 辛卯歲會菊泉於薊北踰八年會于甬

東未幾別去將復之北作此以餞

記橫簾玉關高處萬疊沙寒雪深無路做却貂裘遠
遊歸後共誰語故人何許渾忘了江南舊雨不擬重
逢應笑我飄零如羽同去釣珊瑚海樹底事便成
行旅烟迷斷浦更幾點戀人飛絮如今又京國尋春

詞

綜

卷二十一

十一中華書局聚

定應被薇花留住且莫把孤愁說與當時歌舞

又有懷故居

望花外小橋流水門巷悄然玉簫聲絕鶴去臺空珮
環何處弄明月十年前事愁千折心情頓別露粉風
香誰爲主都成消歇 淒咽曉窗分袂處同把帶鷓
親結江空歲晚肯忘了尊前曾說恨西風不庇寒蟬
便掃盡一林殘葉謝楊柳多情還有綠陰時節

西子妝

吳夢窗自製此曲余喜其聲調爛雅久

欲效而未能甲午春寓羅江陳文卿間
行江上景况離離因填此詞惜舊譜零
落不能倚聲歌也

白浪搖天清陰漲地一片野情幽意楊花點點是春
心替風前萬花吹淚遙岑寸碧有誰看朝來清氣自
沉吟甚流光輕把繁華如此 斜陽外隱約孤村隔
塢閑門閉漁舟何似莫歸來想桃源路通人世危欄
靜倚千年事都消一醉謾依依愁落鷓聲萬里

風入松

小窗晴綠占閑波晝影舞飛梭惜春猶問花多少柳
陰中春已無多乍試泥金巧扇初裁水碧輕羅 園
林未肯愛清和人醉牡丹坡笑歌且醉平生事問東

風畢竟如何燕子尋常巷陌酒邊莫唱西河

瑤臺聚八仙

秋月娟娟人正遠魚鴈待拂吟箋也知遊事多在第二橋邊花底鴛鴦深處睡柳陰淡隔裏湖船路綿綿夢吹舊曲如此山川平生幾兩謝屐便放歌自得直上風烟峭壁誰家長嘯竟落松前十年孤劍萬里又何似哇分抱瓮泉中山酒且醉冷石髓白眼青天

南樓令

風雨客殊鄉梧桐傍小窗甚秋聲今夜偏長暗憶舊時歌舞地誰得似牧之狂茉莉擁釵梁窩雲一枕香醉曹騰多少思量明月半牀人睡覺聽說道夜深涼

南歌子

葉密春聲聚花多瘦影重只留一路過東風圍得生香不斷錦薰籠月地連金屋雲樓瞰翠蓬惺鬆語笑隔簾櫳知是誰調鸚鵡柳陰中

浪淘沙

香霧濕雲鬟葦珮珊珊酒醒微步晚波寒金鼎尚存丹已化雪冷虛壇遊冶未知還鶴怨空山瀟湘無夢繞叢蘭碧海茫茫歸不去却在人間

詞綜卷二十一

詞綜卷二十二

宋詞五十二首

石孝友十三首

孫惟信一首

劉 褒一首

張 槃一首

潘希白一首

湯 恢一首

張 矩二首

趙耆孫一首

翁元龍一首

李肩吾一首

毛 翊一首

康仲伯一首

覃懷高一首

趙 旭一首

梅 扶一首

楊彥齡一首

李 珣一首

方有聞一首

陳德武一首

汪公澤一首

周格非一首

陳襲善一首

丁義叟一首

呂直夫一首

王武子一首

趙君舉一首

王文甫一首

施芸隱一首

鄭覺齋一首

王月山一首

房舜卿一首

林正大一首

薛夢柱一首

曾 揆一首

黃孝邁二首

江 開二首

石孝友字次仲有金谷遺音一卷

點絳脣

霽景澄秋晚風吹盡朝來雨夕陽烟樹萬里山光暮
一帶長川自在流今古人何處月波橫素冷浸蒹
葭浦

又

醉倚危檣望中歸思生天際山腰渚尾幾簇漁樵市
帆落西風一段蘆花水八千里錦書欲寄新鴈曾
來未

西地錦

回望玉樓金闕正水遮山隔風兒又起雨兒又煞好
愁人天色 兩岸荻花楓葉爭舞紅吹白中秋過也
重陽近也作天涯孤客

好事近

微雨灑芳塵醞造可人春色聞道夢雲樓外正小桃
花發 殷勤留取最繁枝樽前待閑折準擬亂紅深
處化 一雙蝴蝶

清平樂

天涯重九獨對黃花酒醉撚黃花和淚嗅憶得去年
攜手 去年同醉流霞醉中折盡黃花還是黃花時

候去年人在天涯

謁金門

雲樹直雨歇半空猶濕山影插尖高幾尺依依銜落日
遠岸雙飛鷺瀟瀟一水無情自碧颯颯白蘋風正
急斷腸人獨立

臨江仙

醉袖吟鞭行色裏帽簷低處風斜晚山一半被雲遮
殘陽明遠水古木集栖鴉暮去朝來緣底事不如
早早還家曲屏深幌小窗紗翠沾眉上柳紅搵臉邊
花

又

長記夢雲樓上住殘燈影裏遲留依稀綠慘更紅羞
露痕雙臉淚山樣兩眉愁一點輕帆天際去雲濤
烟浪悠悠今宵獨宿古江頭水腥魚菜市風碎荻花
洲

南歌子

亂絮飄晴雪殘花繡地衣西園歌舞驟然稀只有多
情蝴蝶作團飛舊事深琴怨新愁減帶圍倚樓凝
望更依依怕見一天風雨捲春歸

又

詞

綜卷二十一

一一中華書局聚

春淺梅紅小山寒嵐翠薄斜風吹雨入簾幕夢覺南樓嗚咽數聲角歌酒工夫懶別離情緒惡舞衫寬盡不堪著若比那回相見更消削

鷓鴣天

別後應憐信息疎西風幾度到庭梧夜來縱有鴛鴦夢春去空餘蚊蝶圖烟樹遠塞鴻孤垂垂天影帶平蕪憑誰寫此相思曲寄與馮川鄭小奴

眼兒媚

愁雲淡淡雨蕭蕭暮暮復朝朝別來應是眉峯翠減腕玉香銷小軒獨坐相思處情緒好無聊一叢萱草數竿脩竹幾葉芭蕉

減字木蘭花贈何藻

新荷小小比目魚兒翻翠藻小小新荷點破清光景趣多青青半捲一寸芳心渾未展待得圓時罩定鴛鴦一對兒

孫惟信字季蕃號花翁有詞一卷

沈伯時云孫花翁有好詞亦善運意但雅

正中忽有一兩句市井語可惜

風流子

三疊古陽關輕寒沁清月滿征鞍記玉笋攬衣翠囊

親贈繡巾拭淚金柳初攀自回首燕臺雲掩冉鳳閣
雨闌珊天有盡頭水無西注鬢難留黑帶易成寬
啼妝東風悄菱花在擬倩錦鳥封還應任恨蛾凝黛
慵髻堆鬟奈情逐事遷心隨春老夢和香冷歡與花
殘閑殺烟茸窗閣十二屏山

劉

褒字伯寵登淳熙進士除司門郎中歷官朝
請郎知西全州有集

滿庭芳留別

柳裊金絲梨鋪香雪一年春事方中燭前乍見花艷
覺羞紅枕臂香痕未落舟橫岸作計匆匆明朝去暮
天平水雙槳碧雲東 隔籬歌一闋琵琶聲斷燕子
樓空歎陽臺夢杳行雨無踪後會芙蓉未老從今去
日望歸鴻愁如織斷腸啼鴉多事訴春風

張

槃有梅厓集

綺羅香漁浦有感

浦月窺檐松泉漱枕屏裏吳山何處暗粉疎紅依舊
爲誰勻注都負了燕約鶯期更閑却柳烟花雨縱十
分春到郵亭賦懷應是斷腸句 青青原上薺麥還
被東風無賴翻成離緒望極天西惟有隴雲江樹斜
照帶一縷新愁盡分付暮潮歸去步閑階時卜心期

詞

綜卷二十一

三中華書局聚

落花空細數

潘希白字懷古號漁莊永嘉人寶祐中登第幹辦

臨安府節制司公事德祐中起為史館檢

較不赴

大有九日

戲馬臺前采花籬下問歲華還是重九恰歸來南山
翠色依舊簾櫳昨夜聽風雨都不似登臨時候一片
宋玉情懷十分衛郎清瘦紅萸佩空對酒砧杵動
微寒暗欺羅袖秋色無多早是敗荷衰柳強整帽簷
欹側曾經向天涯搔首幾回憶故國尊鱸霜前鴈後
湯恢號西村

二郎神用徐幹臣韻

瑣窗睡起閑竚立海棠花影記翠楫銀塘紅牙金縷
杯泛梨花冷燕子銜來相思字道玉瘦不禁春病應
蝶粉半銷鴉雲斜墜暗塵侵鏡還省香痕碧唾春
衫都凝悄一似荼蘼玉肌翠帔消得東風喚醒青杏
單衣楊花小扇閑却晚春風景最苦是蝴蝶盈盈弄
晚一簾風靜

張矩字子成有梅淵詞

應天長麴院風荷

換橋渡舫添柳護堤坡仙舊跡今續四面水窗如染
香波釀春麴田田處成暗綠正萬羽背風斜蠹亂鷗
去不信雙鴛午睡猶熟還記湧金樓共撫雕欄低
度浣沙曲自與故人輕別榮枯換涼燠亭亭影驚艷
目忍到手又成輕觸悄無語獨撚花鬚心事曾卜

又南屏晚鐘

翠屏對晚鳥榜占隄鐘聲又斂春色幾度半空敲月
山南應山北歡娛地空浪迹謾記省五更聞得洞天
曉夾柳橋疎穩縱香勒前度湧金樓嘯傲東風鷗
鷺半相識暗數院僧歸盡長虹臥深碧花間恨猶記
憶正素手暗裁輕拆夜深後不道人來燈細窗隙

趙耆孫

遠朝歸梅

金谷先春見乍開江梅玉膩珠簾院落人靜雨疎烟
細橫斜帶月別是一般風味金尊裏任遺英亂點殘
粉低墜惆悵秦隴當年念水遠天長故人難寄山
城倦眼無緒更看桃李當時醉魄算依舊徘徊花底
斜陽外謾回首畫樓十二

毛

胡字元白號吾竹

踏莎行題草窗詞卷

顧曲多情尋芳未老一庭風日知音少夢隨蝶去恨
牆高醉聽鶯語嫌籠小紅燭呼盧黃金買笑彈絲
踮躑長安道彩箋拈起錦囊花綠窗留得羅裙草

翁元龍字時可號處靜

瑞龍吟

清明近還是遞釐東風做成花訊芳時一刻千金半
晴半雨醉春未準鴈橫陣數字向人慵寫暗雲難
認西園猛憶逢迎翠紉障面花間笑隱曲徑池蓮
平砌絳裙曾與濯香前粉無奈燕幕鶯簾輕負嬌俊
青榆巷陌踟馬紅成寸十年夢秋千弔影鞦羅塵褪
事往憑誰問晝長病酒添新恨烟冷斜陽暝山黛遠
曲曲闌干凭損柳絲萬尺半堤風緊

李肩吾字子我號蠟洲

清平樂

夢魂尋遍忽向尊前見好似烏衣春社燕軟語東風
庭院丁寧記取兒家碧雲隱約紅霞直下小橋流
水門前一樹桃花

康仲伯

憶真妃

匆匆一望關河聽離歌艇子急催雙槳下清波
淋

浪醉闌干淚奈情何明日畫橋西畔暮雲多
覃懷高

水調歌頭遊武夸

翠蕤插雲表初意隔仙凡臨風據案一見邂逅似開
顏幾欲拏舟九曲便擬捫參絕頂直下俯塵寰聊此
稅吾駕贏得片時閑問仙人緣底事去不還長風
浩浩何許清夢杳難攀只有蒼烟古木好在清湍白
石依舊畫圖間回首武夸路窈窕沒雲鬢

趙旭

曲入冥

握管淚盈眸欲寫還休人間情是阿誰留千丈游絲
不落地風外悠悠烟雨晚山稠人在西樓幾行候
鴈下汀洲一箇思鄉寒夜客萬種離愁

梅扶字叔茂

菩薩蠻

絲絲楊柳鶯聲近晚風吹過秋千影寒色一簾輕燈
殘夢不成耳邊消息在笑指花梢待又是不歸來
滿庭花自開

楊彥齡

浣溪沙武進廳壁

詞

卷二十一

五中華書局聚

倦客東歸得自由
西風江上泛扁舟
夜寒霜月素光流
想得故人千里外
醉吟應上謝家樓
不多天氣近中秋

李珣字元輝

擊梧桐 別西湖社友

楓葉濃於染秋正老江上征衫寒淺
又是秦鴻過霽烟外寫出離愁
幾點年來歲去朝生暮落人似吳潮
展轉怕聽陽關曲奈短笛喚起天涯情遠
雙屐行春扁舟嘯晚憶著鷗湖鶯苑
小小梅花屋雪月後記把山扉牢掩
惆悵明朝何處故人相望但碧雲半斂
定蘇堤重來時候芳草如剪

方有聞 字躬明 號堂溪 歙州人中進士 授南豐尉

擢國子學錄 由知和州 遷轉運判官 有堂溪集

點絳脣

七里灘邊江光漠漠山如戟
漁舟一葉徑入寒烟碧
笑我塵勞羞對雙臺石
身如織年年行役魚鳥渾相識

陳德武 三山人有白雪遺音一卷

浣溪沙 送春

月落桐梢杜宇啼雲埋芳樹鷓鴣飛夜闌分作送春詩
山上安山經幾歲口中添口又何時相思一曲訴伊誰

汪存字公澤婺源人授西京文學辭官歸養學者稱四友先生

步蟾宮冬日送姪赴省

玉京此去春猶淺正雪絮馬頭零亂姮娥剪就綠雲裳
待來步蟾宮與換明年二月桃花岸雙槳浪平烟煖揚州十里小紅樓盡卷上珠簾一半

周格非

多麗

隴頭泉未到隴下輕分一聲聲淒涼嗚咽豈堪側耳
重聞細思量那時攜手畫樓高簾幕黃昏月不長圓
雲多輕散天應偏妒有情人自別後小窗幽院無處
不消魂羅衣上殘妝未減猶帶啼痕自一從瓶沉
簪折要知欲見無因也渾疑事如春夢又只恐人是
朝雲破鏡分來朱絃斷後不堪獨自對芳樽試與問
多才誰更匹配得文君須知道東陽瘦損不爲傷春

陳襲善

漁家傲憶營伎周子文

詞

綜卷二十一

六一中華書局聚

珍做宋版印

鷺嶺峯前欄獨倚愁眉蹙損愁腸碎紅粉佳人傷別
袂情何已登山臨水年年是長記同來今獨至孤
舟晚漾湖光裏衰草斜陽無限意誰與寄西湖水是
相思淚

丁義叟

漁家傲

十里寒塘初過雨采蓮舟上誰家女秋水接雲迷遠
樹天光暮船頭忘了回來路却繫蘭舟深處住歌
聲驚散鴛鴦侶波上清風花上露無計去月明腸斷
雙棲羽

呂直夫

洞仙歌

征鞍帶月濃露沾襟袖馬上輕衫峭寒透望翠峯深
淺憶著眉兒腰肢媚忍看風前細柳別時頻囑付
早寄書來能及清明到家否這言語便夢裏也在心
頭重相見不知伊瘦儂瘦縱百卉千花已離披須趁
得醱醑牡丹時候

王武子一作子武文獻通考經籍志有詞一卷

玉樓春聞笛

紅樓十二春寒側樓角何人吹玉笛天津橋上舊曾

聽三十六宮秋草碧 昭華人去無消息 江上青山
空晚色 一聲落盡短亭花 無數行人歸未得

趙君舉字子發

眼兒媚

曉山日薄半春陰 烟煖柳拖金 滿眼新晴 歌聲樓影
悠蕩 碧波心 閑亭客散人歸去 疎雨濕羅襟 樓閣
濛濛 斷虹明處 十里暮雲深

王文甫

虞美人迴文

黃金嫩柳搖絲軟 永日堂空掩 卷簾飛燕未歸來 客
去醉眠 欹枕殢殘杯 眉山淺拂青螺黛 整整垂雙
帶 水沉香熨窄衫 輕瑩玉碧溪春溜 眼波橫

施芸隱

摸魚兒瓊花

柳蒙茸 暗淩波 波路烟飛 慘澹平楚 香車深駐 貌鏡掩
遙認 翠華雲母 芳景暮 鴛鴦悄 銖衣來按飛瓊舞 淒
涼洛浦 漸玉漏沉沉 清陰滿地 乘月步虛去 銷凝
處 誰說三生小 杜鵑聲斷 簫鼓情知 禁苑酥塵宛
羞與 倡紅同譜 春幾度 想依舊 苔痕長 印唐昌土 風
流千古 人在小紅樓 珠簾半捲 香注玉壺露

鄭覺齋

揚州慢 瓊花

弄玉輕盈飛瓊淡，佇襪塵步下迷樓。試新妝纔了，炷
沉水香球。記曉剪春冰，馳送金莖露濕。緹騎星流甚
天中月色，被風吹、夢南州。樽前相見，似羞人蹤跡。
萍浮問弄雪，飄枝無雙亭上。何日重遊，我欲纏腰騎
鶴烟霄遠，舊事悠悠。但凭欄無語，烟花三月春愁。

王月山

臺城路 初秋

夜來疎雨鳴金井，一葉舞風紅淺。蓮渚生香，蘭皋浮
爽涼思，頓欺班扇。秋光冉冉，任老却蘆花西風，不管
清興難磨。幾回有句到詩卷。長安故人別後，料征
鴻聲裏，畫欄凭遍。橫竹吹商，疎砧點月，好夢又隨雲
遠。閑情似綫，共繫損柔腸，不堪裁剪。聽著寒蛩一聲
聲是怨。

房舜卿

秦樓月

與君別相思，一夜梅花發。梅花發，淒涼南浦，斷橋斜
月。盈盈微步凌波襪，東風笑倚天涯闊。天涯闊，一
聲羌管暮雲愁絕。

林正大字敬之號隨菴嘉泰中人著有風雅遺音

四卷

滿江紅括盧仝有所思

爲憶當時沉醉裏青樓弄月閑想像繡幃珠箔魂飛
心折羞向姮娥談舊事幾經三五盈還缺望翠眉蟬
髻一天涯傷離別尋昨夢巫雲結流別淚湘江咽
對花深兩岸忽添悲切試與含愁彈綠綺知音不遇
絃空絕忽窗前一夜寄相思梅花發

薛夢桂字叔載號梯隴

醉落魄

單衣乍著滯寒更傍東風作珠簾壓定銀鈎索雨弄
新晴輕旋玉塵落花唇巧借妝紅約嬌羞纔放三
分萼尊前不用多評泊春淺春深都向杏梢覺

三姝媚

薔薇花謝去更無情連夜送春風雨燕子呢喃似念
人憔悴往來朱戶漲綠烟深早零落點池萍絮暗憶
年華羅帳分釵又驚春暮芳草淒迷征路待去也
還將畫輪留住縱使重來怕粉容消膩却羞郎覷細
數盟言猶在悵青樓何處綰盡垂楊爭似相思寸縷
曾揆字舜卿號懶翁

西江月

檐雨輕敲夜夜牆雲低度朝朝日長天氣已無聊何
况洞房人悄眉共新荷不展心隨垂柳頻搖午眠
髣髴見金翹驚覺數聲啼鳥

黃孝邁字德文號雪舟

湘春夜月

近清明翠禽枝上消魂可惜一片清歌都付與黃昏
欲共柳花低訴怕柳花輕薄不解傷春念楚鄉旅宿
柔情別緒誰與溫存空樽夜泣青山不語殘月當
門翠玉樓前惟是有一波湘水搖蕩湘雲天長夢短
問甚時重見桃根這次第算人間沒箇并刀剪斷心
上愁痕

水龍吟

閒情小院沉吟草深柳密簾空翠風簷夜響殘燈慵
剔寒衾怯睡店舍無烟關山有月梨花滿地二十年
好夢不曾圓合而今老都休矣誰共題詩秉燭兩
厭厭天涯別袂柔情一寸七分是恨三分是淚芳信
不來玉簫塵染粉衣香退待問春怎把千紅換得一
池綠水

江開字開之號月湖

浣溪沙

手撚花枝憶小蘋
綠窗空鎖舊時春
滿樓飛絮一箏塵
素約未傳雙燕語
新愁還入賣花聲
十分春事倩行雲

杏花天

謝娘庭院通芳徑
四無人花梢轉影
幾番心事無憑準
等得青春過盡
鞦韆下佳期又近
算畢竟沉吟未穩
不成又是教人恨
待倩楊花去問

詞綜卷二十一

詞綜卷二十三

宋詞五十九首

文天祥一首

鄧剡二首

王鼎翁一首

何夢桂二首

李南金一首

莫崙一首

徐一初一首

劉辰翁三首

黃公紹一首

李萊老一首

李彭老六首

王易簡五首

馮應瑞一首

唐藝孫三首

呂同老三首

練恕可四首

趙汝鈞一首

唐珏四首

李居仁一首

王夢應一首

譚宣子二首

陳逢辰一首

樓采三首

奚滅一首

趙聞禮一首

文天祥 字宋瑞 又字履善 吉水人 舉進士第一 歷

軍官 右丞兼樞密使 加少保 信國公 爲元

兵所執 留燕三年 不屈死 柴市 有文山集

大江東去 驛中言別友人

水天空闊 恨東風不借 世間英物 蜀鳥吳花 殘照裏

忍見荒城頽壁銅雀春情金人秋淚此恨憑誰雪
堂劍氣斗牛空認奇傑那信江海餘生南行萬里
送扁舟齊發正為鷗盟留醉眼細看濤生雲滅晚柱
吞羸回旗走懿千古衝冠髮伴人無寐秦淮應是孤
月

鄧

剡

集

字光薦廬陵人宋亡後以節行稱有中齋

賣花聲

疎雨洗天清枕簟涼生井梧一葉做秋聲誰念客身
輕似葉千里飄零夢斷古臺城月澹潮平便須攜
酒訪新亭不見當時王謝宅烟草青青

南樓令

雨過水明霞潮回岸帶沙葉聲寒飛透窗紗懊恨西
風催世換更隨我落天涯寂寞古豪華烏衣日又
斜說興亡燕入誰家只有南來無數鴈和明月宿蘆
花

王鼎翁字炎午安福人上舍生有梅邊集

沁園春

又是年時杏紅欲吐柳綠初芽奈尋春步遠馬嘶湖
曲賣花聲過人唱窗紗暖日晴烟輕衣羅扇看遍王

孫七寶車誰知道十年魂夢風雨天涯 休休何必
傷嗟謾贏得青青兩鬢華且不知門外桃花何代不
知江左燕子誰家世事無情天公有意歲歲東風歲
歲花攢一笑且醒來杯酒醉後杯茶

何夢桂

字巖叟初名應祈字申甫淳安人咸淳中

廷試一甲三名授台州軍事判官歷仕至

大理寺卿至元中累徵不起有潛齋集詞

一卷

摸魚兒

記年時人人何處長亭會共杯酒酒酒闌歸去行人遠
折不盡長亭柳漸白首待把酒送君恰又清明後青
條似舊問江北江南離愁如我還更有人否 留不
住強把蔬盤淪韭行舟又報潮候風急岸花飛盡也
一曲啼紅滿袖春波皺青草外人間此恨年年有留
連握手歎人世相逢百年歡笑能得幾回又

喜遷鶯

留春不住又早是清明楊花飛絮杜宇聲聲黃昏庭
院那更半簾風雨勸春且休歸去芳草天涯無路悄
無語待闌干立盡落紅無數 誰翹長門事記得當
年曾趁梨園舞霓羽香銷梁州聲歇昨夢轉頭今古

金屋玉樓何在尚有花鈿塵土君不顧怕傷心休上危樓高處

李南金自號三溪冰雪翁

賀新郎 贈妓

流落今如許我亦三生杜牧為秋娘著句先自多愁多感慨更值江南春暮君看取落花飛絮也有吹來穿繡幌有因風飄墮隨塵土人世事總無據 佳人命薄君休訴若說與英雄心事一生更苦且盡樽前今日意休記綠窗眉嫵但春到兒家庭戶幽恨一簾烟月曉恐明朝鴈亦無尋處渾欲倩鶯留住

莫 崙字若山

摸魚兒

聽春教燕顰鶯訴朝朝花困風雨六橋忘却清明後碧盡柳絲千縷蜂蝶侶正閑覓閑花閑草閑歌舞最憐西子尚薄薄雲情盈盈波淚點點舊眉嫵 流紅記空泛秋宮怨句才人何處嬌如落紅無限隨風絮詩恨有誰曾遇堪恨處恨二十四番花信催花去東君暗苦更多囑多情多愁杜宇多訴斷腸語

徐一初

摸魚兒

對茱萸一年一度龍山今在何處參軍莫道無勳業
消得從容樽俎君看取便破帽飄零也得傳千古當
年幕府知多少時流等閑收拾有箇客如許 追往
事滿目山河晉土征鴻又過邊羽登臨莫上高層望
怕見故宮禾黍觴綠醕澆萬斛牢愁淚閣新亭雨黃
花無語畢竟是西風披拂猶識舊時主

劉辰翁

字會孟廬陵人舉進士值宋亂隱居不仕

寶鼎現丁酉元夕

紅妝春騎踏月花影千旗穿市望不盡瑤樓歌舞習
習香塵蓮步底簫聲斷約彩鸞歸去未怕金吾呵醉
甚輦路喧闐且止聽得念奴歌起 父老猶記宣和
事抱銅仙清淚如水還轉盼沙河多麗滉漾明光連
邸第簾影凍散紅光成綺月浸蒲桃十里看往來神
仙才子肯把菱花撲碎 腸斷竹馬兒童空見說三
千樂指等多時春不歸來到春時欲睡又說向燈前
擁髻暗滴鮫珠墜便當日親見霓裳天上人間夢裏

大酺春寒

任瑣窗深重簾閉春寒知有人處當年笑花信問東
風情性是嬌是妒冰柳成鬚吹桃欲削知更海棠堪

否相將燕歸又看香泥半雪欲歸還誤謾低回芳草
依稀寒食朱門封絮少年慣羈旅亂山斷欹樹喚
船渡正暗思雞聲落月梅影孤屏更夢衾千里似霧
相如倦遊去掩四壁淒其春暮休回首都門路幾番
行曉個個阿嬌深貯而今斷烟細雨

蘭陵王送春

送春去春去人間無路鞦韆外芳草連天誰遣風沙
暗南浦依依甚意緒謾憶海門飛絮亂鴉過斗轉城
荒不見來時試燈處春去最誰苦但箭鴈沈邊梁
燕無主杜鵑聲裏長門暮想玉樹凋土淚盤如露咸
陽送客屢回顧斜日未能渡春去尚來否正江令
恨別庾信愁賦蘇堤盡日風和雨歎神遊故國花記
前度人生流落顧孺子共夜語

黃公紹譙郡人咸淳進士

青玉案

年年社日停針線爭忍見雙飛燕今日江城春已半
一身猶在亂山深處寂寞溪橋畔征衫著破誰針
線點點行行淚痕滿落日解鞍芳草岸花無人戴酒
無人勸醉也無人管

李萊老字遜翁

清平樂 題草窗詞

日寒風細庭館浮花氣白髮潘郎吟欲醉綠暗蘼蕪
千里西園南浦東城一春多少閑情日暮采蘋歌
遠夢回喚得愁醒

李彭老字周隱號箕房

天香 龍涎香

搗麝成塵薰薇注露風酣百和花氣品重雲頭葉翻
蕉樣共說內家新製波浮海沫誰喚覺鮫人春睡清
潤俱饒片片芬馥半是沉水相逢酒邊雨外火初
溫翠爐烟細不侶寶珠金縷領巾紅墜荀令如今憔悴
消未盡當時愛香意燼暖燈寒秋聲素被

摸魚兒 蕁

過垂虹四橋飛雨沙痕初漲春水腥波十里吳歛遠
綠蔓半縈船尾連復碎愛滑卷青簫香裊冰絲細山
人雋味笑杜老無情香羹碧澗空祇賦芹美歸期
早誰似季鷹高致鱸魚相伴菰米紅塵如海丘園夢
一葉又秋風起湘湖外看采擷芳條際曉隨魚市舊
遊謾記但望極江南秦鬟賀鏡渺渺隔烟翠

桂枝香 蟹

松江岸側正亂葉墜紅殘浪收碧猶記燈寒暗聚斲

疎輕入休嫌郭索尊前笑且開顏共傾芳液翠橙絲
霧玉葱苑雪嫩黃初擘與那日新詩換得又幾度
相逢落潮秋色常是籬邊早菊慰渠岑寂如今謾有
江山興更誰憐草泥蹤跡但將身世浮沉醉鄉舊遊
休憶

浣溪沙 題贛洲漁笛譜

玉雪庭心夜色空移花小檻鬪春紅輕衫短帽醉歌
重彩扇舊題烟雨外玉簫新譜燕鶯中闌干到處
是春風

清平樂

綠窗初曉枕上聞啼鳥不恨王孫歸不早只恨天涯
芳草錦書紅淚千行一春無限思量折得垂楊寄
與絲絲都是愁腸

一萼紅 寄弁陽嘯翁

過薔薇正風暄雲澹春去未多時古岸停橈單衣試
酒滿眼芳草斜暉故人老經年賦別燈暈裏相對夜
何其泛剡清愁買花芳事一卷新詩流水孤航漸
遠想家山猿鶴喜見重歸北阜尋幽青津問釣多情
楊柳依依最難忘吟邊舊語數菖蒲老是來期幾夕
相思夢蝶飛遶蘋溪

王易簡字理得山陰人

天香龍涎香

烟嶠收痕雲沙擁沫孤槎萬里春聚蠟杵冰塵水研
花片帶得海山風露纖痕透曉銀鏤小初浮一縷重
剪紗窗暗燭深垂繡簾微雨 餘馨惱人最苦染羅
衣少年情緒謾省珮珠曾解蕙羞蘭妒好是芳鈿翠
嫵限素被濃熏夢無據待剪秋雲殷勤寄與

水龍吟白蓮

翠裳微護冰肌夜深暗泣瑤臺露芳容淡泞風神蕭
散凌波晚步西子殘妝環兒初起未須勻注看明璫
素襪相逢憔悴當應被薰風誤 十里雲愁雪妒抱
淒涼盼嬌無語當時姊妹朱顏褪酒紅衣按舞別浦
重尋舊盟惟有一行鷗鷺伴玉顏月曉盈盈冷豔洗
人間暑

摸魚兒蕙

怪鮫宮水晶簾捲冰痕初斷香縷柔波蕩槳人難到
三十六陂烟雨春又去伴點點荷錢隱約吳中路相
思日暮恨洛浦娉婷芳鈿翠剪奩影照淒楚 功名
夢消得西風一度高人今在何許鱸香菰冷斜陽裏
多少天涯意緒誰記取但枯豉紅鹽溜玉凝秋筍樽

前起舞算惟有淵明黃花歲晚此興共千古

珍傲宋版印

又前題

過湘臯碧龍驚起冰涎猶護髯影春洲未有菱歌伴
獨占暮烟千頃呼短艇試剪取纖條玉溜青絲瑩樽
前細認似水面新荷波心半卷點點翠鈿淨 淒涼
味酪乳那堪比並吳鹽一箸秋冷當時不爲鱸魚去
聊爾勤渠歸興還記省是幾度西風幾處吹愁醒鷗
昏鷺暝謾換得霜痕蕭蕭兩鬢羞與共秋鏡

齊天樂 蟬

碧雲深鎖齊姬恨纖柯暗翻冰羽錦瑟重調綃衣乍
著聊飲人間風露相逢甚處記槐影初涼柳陰新雨
聽盡殘聲爲誰驚起又飛去 商量秋信最早晚來
吟未徹都是淒楚斷韻還連餘悲似咽欲和愁邊佳
句幽期與語怕寒葉凋零蛻痕塵土古木斜暉向人
懷抱苦

馮應瑞字祥父號友竹

天香 龍涎香

枯石流痕殘沙擁沫驪宮夜蟄驚起海市收時鮫人
分處誤入衆芳叢裏春霖未就都化作淒涼雲氣惟
有清寒一點消磨小窗殘醉 當年翠篝素被拂餘

熏倦懷如水謾惜舞紅猶在爲誰重試幾片金昏字
古向故篋聊將伴憔悴□□□□□□□□□□□□□□
唐藝孫字英發有瑤翠山房集

天香龍涎香

螺甲磨星犀株搗月蕤英嫩壓拖水海蜃樓高仙娥
鈿小縹緲結成心字麝煤候暖載一朵輕雲未起銀
葉初生薄暈金猊旋翻纖指芳盃惱人漸醉碾微
馨鳳團閑試滿架舞紅都換懶收珠珮幾片菱花鏡
裏更摘索雙環伴秋睡早是新涼重熏翠被

齊天樂蟬

柳風微扇閑池閣深林翠陰人靜漸理琴絲誰調金
奏淒咽流空清韻虹明雨潤正乍集庭柯凭欄新聽
午夢驚回有人嬌困酒初醒西軒晚涼又嫩向枝
頭占得銀露千頃蛻剪花輕翼翻紙薄老去易驚秋
信殘聲送暝恨秦樹斜陽暗催光景淡月疎桐半窗
留鬢影

桂枝香蟹

收帆渡口認遠岸夜篝松炬如晝還見沙痕雪外水
紋霜後秦宮夢到無腸斷望明河月殘疎柳瑣窗相
對茶邊猶記眼波頻溜漸嫩菊初籊綠酒歎風味

尊前瀟灑如舊幾度金橙香霧玉盤纖手清愁小醉
淒涼裏揀今生容易消瘦草心春淺年年相憶看燈
時候

呂同老字和甫

水龍吟白蓮

冰肌不汚天真曉來玉立瑤池裏亭亭翠蓋盈盈素
靨時妝淨洗太液波翻霓裳舞罷斷魂流水甚依然
舊日濃香淡粉花不似人憔悴 欲喚凌波仙子泛
扁舟浩波千里只愁回首冰奩半掩明璫亂墜月影
淒迷露華零落小欄誰倚共芳盟猶有雙棲雪鷺夜
寒驚起

齊天樂蟬

綠陰初蔽林塘路淒淒乍留清韻倦咽高槐驚嘶別
柳還憶當時曾聽西窗夢醒歎絃絕重調珥空難整
綽約冰綃夜深誰念露華冷 不知身世易老一聲
聲斷續頻報秋信墜葉山明疎枝月小惆悵齊姬薄
倖餘音未盡早枯翼飛仙暗嗟殘景見洗冰奩怕翻
雙翠鬢

天香龍涎香

冰片鎔肌水沉換骨蜿蜒夢斷瀛島剪碎腥雲杵勻

枯沫妙手製成翻巧金篝候火無似有微熏初好簾
影垂風不動屏深護春宜小 殘梅舞紅褪了珮珠
寒滿懷清峭幾度酒餘重省舊愁多少荀令風流未
減怎奈向飄零賦情老待寄相思仙山路杳
練恕可字行之越州人

水龍吟吟白蓮

素姬初宴瑤池珮環誤落雲深處分香華井洗妝湘
渚天姿淡泞碧葢吹涼玉冠迎曉盈盈笑語記當時
乍識江明夜淨只愁被嬋娟誤 幾點沙邊飛鷺舊
盟寒遠迷烟雨相思未盡纖羅曳水清鉛泣露玉鏡
臺空銀瓶綆絕斷魂何許待今宵試採中流一葉共
凌波去

齊天樂蟬

碧柯搖曳聲何許陰陰晚涼庭院露濕身輕風生翅
薄昨夜夜綃衣初剪琴絲宛轉弄幾曲新聲幾番淒惋
過雨高槐爲渠一洗故宮怨 清虛襟度謾與向人
低訴處幽思無限敗葉枯形殘陽絕響消得西風腸
斷塵情已倦任翻鬢雲寒綴貂金淺蛻羽難留頓驚
仙夢遠

又前題

詞

綜卷二十三

七中華書局聚

蛻仙飛珮流空遠
珊珊數聲林杪薄
暑眠輕濃陰聽
久勾引淒涼多少
長吟未了想猶怯
高寒又移深窈
與整綃衣滿身風
露正清曉微熏庭
院晝永那回
曾記得如訴幽抱
斷響難尋餘悲獨
省葉底還驚秋
早齊宮路杳歎事
往魂消夜閑人悄
謾想輕盈粉奩
雙鬢好

桂枝香蟹

西風故國記乍脫
內黃歸夢溪曲還
是秦星夜映楚
霜秋足無腸枉抱
東流恨任年年褪
筐微綠草汀篝
火蘆州緯箔早寒
漁屋敘舊別芳筍
薦玉正香擘
新橙清泛佳菊依
約行沙亂雪誤驚
窗竹江湖歲晚
相思遠對孤燈謾
懷幽獨嫩湯浮眼
枯形蛻殼斷魂
重續

趙汝鈞字真卿號月洲

水龍吟白蓮

露華洗盡凡妝
玉妃來待瑤池宴
風裳水珮冰肌雪
艷清涼不汗解語
情多凌波步穩酒
容消散想溫泉
浴罷天然真態渾
疑疑是宮妝淺
暗想淒愁別岸粉
痕消香腮凝腕雪
空水冷此情惟許
鷺知鷗見羽扇
微搖翠帷低擁清
涼亭院待夜深月
上闌干更邀取

姮娥伴按結句與調稍異

唐

玕字玉潛號菊山越州人與林景熙相善宋

亡同爲采藥之行潛拾諸陵遺骸攢葬樹
以冬青私識焉世人多其義烈

摸魚兒

漸滄浪凍痕銷盡瓊絲初漾明鏡鮫人夜剪龍髯滑
織就水晶簾冷鳧葉淨最好似嫩荷半捲浮晴影玉
流翠凝早枯鼓融香紅鹽和雪醉齒嚼清瑩功名
夢曾被秋風喚醒故人應動高興悠然世味渾如水
千里舊懷誰省空對景奈回首姑蘇臺畔愁波暝烟
寒夜靜但只有芳洲蘋花與老何日泛歸艇

桂枝香

蟹

松江舍北正水落晚汀霜老枯菰還見青筐似繡紉
螯如戟西風有恨無腸斷悵東流幾番潮汐夜燈爭
聚微光挂影誤投簾隙更喜薦新筍玉液正半殼
含黃一醉秋色纖手香橙風味有人相憶江湖歲晚
聽飛雪但沙痕空記行迹至今茶鼎時時猶記眼波
愁碧

臺城路

蟬

蛻痕初染仙莖露新聲又移涼影珮玉流空綃衣剪

詞

綜卷二十一

八中華書局聚

霧幾度槐昏柳暝幽窗睡醒奈欲斷還連不堪重聽
怨結齊姬故宮烟樹翠陰冷當時舊情在否晚妝
清鏡裏猶記嬌鬢亂咽頻驚餘悲漸杳搖曳風枝未
定秋期話盡又抱葉淒淒暮寒山靜付與孤蛩苦吟
清夜永

水龍吟 白蓮

淡妝人更嬋娟晚奩淨洗鉛華膩泠泠月色蕭蕭風
度嬌紅欲避太液池空霓裳舞倦不堪重記歎冰魂
猶在翠輿難駐玉簪爲誰輕墜別有凌空一葉泛
清寒素波千里珠房淚濕明璫恨遠舊遊夢裏羽扇
生秋瓊樓不夜尚遺仙意奈香雲易散綃衣半脫露
涼如水

李居仁 字師呂號五松

水龍吟 白蓮

藥仙羣擁宸遊素肌似怯波心冷霜裳縞夜冰壺凝
露紅塵洗盡弄玉輕盈飛瓊綽約淡妝臨鏡更多情
一片碧雲不捲籠嬌面回清影菱唱數聲乍聽載
名娃藕絲縈艇雪鷗沙鷺夜來同夢曉風吹醒酒暈
全消粉痕微漬色明香瑩問此花曷貯瑤池應未許
繁紅竝按結句與調稍異

王夢應字靜得攸縣人咸熙中進士調廬陵尉元
兵陷臨安起兵勤王兵敗奔永新卒

念奴嬌

欲霜更雨記青黃籬落東風前此簾外秋容人共老
鴈與愁飛千里水郭烟明竹陂波小萬葉寒聲起凭
高那更九疑吹盡雲氣 婉婉空復多情年年歸夢
花與柴桑似誰解魂消風日晚短笛孤舟秋水江蟹
籠新露黃斟淺澆得鄉關思平蕪天遠一痕黃抹秋
霽

譚宣子字明之號在菴

謁金門

人病酒生怕日高催繡昨夜新番花樣瘦旋描雙蝶
湊 閒凭繡牀呵手却說春愁還又門外東風吹綻
柳海棠花廝勾

江城子 詠柳

嫩黃初染綠初描倚春嬌索春饒燕外鶯邊想見萬
絲搖便作無情終軟美天賦與眼眉腰 短長亭外
短長橋駐金鑣繫蘭橈可愛風流年紀可憐宵辦得
重來攀折後烟雨暗不辭遙

陳逢辰字振祖號存熙

鳥夜啼

月痕未到朱扉送郎時暗裏一汪兒淚沒人知
搵不住收不聚被風吹吹作一天愁雨損花枝

樓采字君亮

瑞鶴仙

凍痕消夢草又招得春歸舊家池沼園扉掩寒峭倩
誰將花信徧傳深窈追遊趁早便裁却輕衫短帽任
殘梅飛滿溪橋和月醉眠清曉年少青絲纖手綵
勝嬌鬟賦情誰表南樓信杳江雲重雁歸少記衝香
嘶馬流紅回岸幾度綠楊殘照想暗黃依舊東風霸
陵古道

法曲獻仙音

花匣么絃象奩雙陸舊日留歡情意夢到銀屏恨裁
蘭燭香篝夜闌鴛鴦被料燕子重來地桐陰鎖窗綺
倦梳洗暈芳鈿自羞鸞鏡羅袖冷烟柳畫欄半倚淺
雨壓荼蘼指東風芳事餘幾院落黃昏怕春鶯驚笑
憔悴倩柔紅約定喚取玉簫同醉

二郎神

露牀轉玉喚睡醒綠雲梳曉正倦立銀屏新寬衣帶
生怯輕寒料峭悶絕相思無人問但怨入牆陰啼鳥

嗟露屋鎖春晴風暗晝柳輕梅小
人悄日長謾憶
秋千嬉笑悵燼冷爐薰花深鶯靜簾箔微紅醉裊帶
結留詩粉痕銷帕情遠竊香年少疑恨極盡日憑高
目斷淡烟芳草

奚

減字倬然號秋崖

華胥引中秋紫霞席上

澄空無際一幅輕綃素秋弄色剪剪天風飛飛萬里
吹淨碧遙想玉杵芒寒聽佩環無迹圓缺何心有心
偏照歌席 多少情懷甚年年共憐今夕藥宮珠殿
還吟飄香秀筆隱約霓裳聲度認紫霞樓笛獨鶴歸
來更無清夢成覓

趙聞禮字立之號釣月

水龍吟水仙

幾年埋玉藍田綠雲翠水烘春暖衣熏麝馥韞羅塵
沁凌波步淺鈿碧搔頭膩黃冰腦參差難剪乍聲沉
素瑟天風珮冷翩躚舞霓裳徧 湘波盈盈月滿抱
相思夜寒腸斷含香有恨招魂無路瑤琴寫怨幽韻
淒涼暮江空渺數峰清遠粲迎風笑持花酌酒結南
枝伴

詞綜卷二十三

詞綜卷二十四

宋詞七十首

寇寺丞一首

陳參政一首

杜郎中一首

德祐太學生二首

無名氏四十五首

裴湘一首

僧揮三首

祖可三首

惠洪一首

上清蔡真人一首

于真人二首

葛長庚八首

乩仙一首

寇寺丞

點絳脣

春睡曹騰覺時鴛被堆香煖起來猶懶獨自情何限
深院日斜人靜花陰轉柔腸斷凭高不見芳草連
天遠

陳參政

木蘭花慢送陳石泉自北歸

北歸人未老喜依舊著南冠正雪暗滹沱雲迷茫陽
夢落邯鄲鄉心促日行萬里幸此身生入玉門關多
少秦烟隴霧西湖淨洗征衫 燕山望不見吳山回
首一征鞍慨故宮離黍故家喬木那忍重看鈞天紫

微何處問瑤池八駿幾時還誰在天津橋上杜鵑聲裏闌干

杜郎中

玉樓春

風解池冰蟬翅薄庭樹枯枝翻翠萼背寒就暖起偏慵半捲珠簾憑書閣晴景融融烟漠漠天際行人乖信約病身先是怕春來長到恁時添瘦削

德祐太學生

百字令 德祐乙亥

半堤花雨對芳辰消遣無奈情緒春色尚堪描畫在萬紫千紅塵土鷓鴣促歸期鶯收伎舌燕作留人語遶欄紅藥韶華留此孤主真個恨殺東風幾番過了不似今番苦樂事賞心磨滅盡忽見飛書傳羽湖水湖烟峯南峯北總是堪傷處新塘楊柳小腰猶自歌舞見湖海新聞三四謂衆宮女行五謂朝士去六謂臺官獸七指太學上書八九謂只陳宜中在東風謂賈似道飛書傳羽北軍至也新塘楊柳謂賈妾

祝英臺近 德祐乙亥

倚危欄斜日暮暮暮甚情緒穉柳嬌黃全未禁風雨春江萬里雲濤扁舟飛渡那更聽塞鴻無數歎離

阻有恨流落天涯誰念泣孤旅滿目風塵冉冉如飛
霧是何人惹愁來那人何處怎知道愁來不去穉柳
謂幼君嬌黃謂太后扁舟飛渡謂北軍至塞鴻指流
民也人惹愁來謂賈出那人何處謂賈去

無名氏

魚遊春水 春景

秦樓東風裏燕子還來尋舊壘餘寒猶峭紅日薄侵
羅綺嫩草方抽碧玉茵媚柳輕窄黃金縷鶯轉上林
魚遊春水 幾曲闌干遍倚又是一番新桃李佳人
應怪歸遲梅妝淚洗鳳簫聲絕沉孤鴈望斷清波無
雙鯉雲山萬重寸心千里

眉峯碧

蹙破眉峯碧纖手還重執鎮日相看未足時忍便使
鴛鴦隻 薄暮投村驛風雨愁通夕窗外芭蕉窗裏
人分葉上心頭滴玉照新志裕陵親書其後此詞甚
佳不知何人所作

撲蝴蝶

烟條雨葉綠遍江南岸思歸倦客尋芳來較晚岫邊
紅日初斜陌上花飛正滿淒涼數聲羌管 怨春短
玉人應在明月樓中畫眉嬾蠻箋錦字多時魚鴈斷

恨隨去水東流事與行雲共遠羅衾舊香猶暖胡元
任云非惟藻麗可喜其腔調亦自婉美

踏莎行

碧蘚迴廊綠楊深院花期夜入簾猶捲照人無奈月
華明潛身却恨花陰淺密約難憑幽歡未展看看
滴盡銅壺箭闌干敲遍不應人分明燭下聞刀剪

玉隴瓊

城南路橋南樹玉鈎簾卷香橫霧新相識舊相識淺
顰低笑嫩紅輕碧惜惜惜劉郎去阮郎住爲雲爲
雨朝還暮心相憶空相憶露荷心性柳花踪跡得得
得能改齋漫錄近有士人嘗於錢塘江漲橋爲狹斜
之游作此詞其後朝廷復收河南士人陷而不返其
友作詩寄之且附以龍涎香詩云江漲橋邊花發時
故人曾共著征衣請君莫唱橋南曲花已飄零人不
歸士人在河南得詩酬之云認得吳家心字香玉窗
春夢紫羅囊餘薰未歇人何許洗破征衣更斷腸

九張機

見樂府雅詞

一張機采桑陌上試春衣風晴日暖慵無力桃花枝
上啼鶯言語不肯放人歸

又

四張機鴛鴦織就欲雙飛可憐未老頭先白春波碧
草曉寒深處相對浴紅衣

又

五張機橫紋織就沈郎詩中心一句無人會不言愁
恨不言憔悴只恁寄相思

又

七張機春蠶吐盡一生絲莫教容易裁羅綺無端剪
破仙鸞彩鳳分作兩邊衣

又

九張機雙花雙葉又雙枝薄情自古多離別從頭到
底將心縈繫穿過一條絲

又

輕絲象牀玉手出新奇千花萬草光凝碧裁縫衣著
春天歌舞飛蝶語黃鸝

又

春衣素絲染就已堪悲塵昏汗污無顏色應同秋扇
從茲永棄無復奉君時

玉樓春題鉛山驛壁

見能改齋謾錄

東風楊柳門前路畢竟雕鞍留不住柔情勝似嶺頭
雲別淚多於花上雨青樓畫幕無重數聽得樓邊

車馬去若將眉黛染情深直到丹青難畫處

踏青游贈妓崔念四

識箇人人恰止二年歡會似賭賽六隻渾四向巫山
重重去如魚水兩情美同倚畫樓十二倚了又還重
倚兩日不來時時在人心裏擬問卜常占歸計揀
三入清齋望永同鴛被到夢裏驀然被人驚覺夢也
有頭無尾吳虎臣云政和間士人作都下盛傳

調笑桃源集句 見宣和九重樂府

相誤桃源路萬里蒼蒼烟水暮留君不住君須去秋
月春風閑度桃花零亂如紅雨人面不知何處

祝英臺近 憶別 見樂府雅詞

海棠開花影下憶得舊遊戲恰似驂鸞同在彩雲裏
夢回雨散雲收匆匆歸去一枕乍驚殘春睡 甚情
味人去花也飄零餘香半憔悴點點飛紅都是去時
淚可堪冷落黃昏瀟瀟微雨斷魂處朱欄獨倚

又

剪醪醖移芍藥深院教鸚鵡消遣宿醒欹枕熏沉炷
自從載酒西湖探梅南浦久不見雪兒歌舞 恨無
據因甚不展眉頭凝愁過百五雙燕無情難寄斷腸
句可憐淚濕青綃怨題紅葉落花亂一簾風雨

水調歌頭建炎庚戌題吳江 見中吳記聞

平生太湖上短棹幾經過如今重到何事愁與水雲
多擬把匣中長劍換取扁舟一葉歸去老漁簑銀艾
非吾事丘壑已蹉跎 鱸新鱸斟美酒起悲歌太平
生長豈謂今日識干戈欲瀉三江雪浪淨洗邊塵千
里不為挽天河回首望霄漢雙淚墮清波

楊柳枝 見樂府雅詞

簌簌花飛一雨殘乍衣單屏風數幅畫江山水雲閑
安 別易會難無計那淚潛潛夕陽樓上凭闌干望長

浣溪沙 瓜陂舖題壁 見能改齋謾錄

剪碎香羅裏淚痕鷓鴣聲斷不堪聞馬嘶人去近黃
昏 整整斜斜楊柳陌疎疎密密杏花村一番風月
更消魂黃季岑云瓜洲瓜陂舖有用篔簹刀刻青泥壁
為詞

鷓鴣天上元 見蘆浦筆記

宣德樓前雪未融賀正人見彩山紅九衢照影紛紛
月萬井吹香細細風 複道遠暗相通平陽主第五
王宮鳳簫聲裏春寒淺不到珠簾第二重劉興伯云
上元詞十五首備述宣政之盛非想像者所能道當

與夢華錄並行也

綠意荷葉 見樂府雅詞

碧圓自潔向淺洲遠浦亭亭清絕猶有遺簪不展秋
心能卷幾多炎熱鴛鴦密語同傾蓋且莫與浣紗人
說怨歌忽斷花風碎却翠雲千疊 回首當年漢舞
怕飛去謾縹留仙裙褶戀戀青衫猶染枯香還笑鬢
絲飄雪盤心清露如鉛水又一夜西風聽折喜淨看
匹練秋光倒瀉半湖明月

擷芳詞 見古今詞話

風搖動雨濛茸翠條柔弱花頭重春衫窄香肌濕記
得年時共伊曾摘 都如夢何曾共可憐孤似釵頭
鳳關山隔晚雲碧燕兒來也又無消息

御街行 見古今詞話

霜風漸緊寒侵袂聽孤鴈聲嘹唳一聲聲送一聲悲
雲淡碧天如水披衣告語鴈兒略住聽我些兒事
塔兒南畔城兒裏第三箇橋兒外瀕河西岸小紅樓
門外梧桐雕砌請教且與低聲飛過那裏有人人無
寐

應天長 見古今詞話

雕鞍成謾駐望斷也不歸院深天暮倚遍舊日曾共

凭肩門戶踏青何處所想醉拍春衫歌舞征旆舉一
步紅塵一步回顧 行行愁獨語想媚容今宵怨郎
不住來爲相思却又空將愁去去人生無定據歎後會
不知何處愁萬縷憑仗東風和淚吹與

念奴嬌 和東坡韻

炎精中否歎人材委靡都無英物鐵馬長驅三犯闕
誰作長城堅壁萬里奔騰兩宮幽陷此恨如何雪草
廬三顧豈無高臥英傑 天意建我中興吾君神武
卜一作睡曾孫周發海岳封疆俱效職 一作順埃火
會看消滅翠羽南巡叩闥無路徒有衝冠髮孤忠耿
耿劍鏗冷浸秋月

又題 項羽廟

鮑魚腥斷楚將軍鞭虎驅龍而起空費咸陽三月火
鑄就金刀神器垓下兵稀陰陵道狹月暗雲如壘楚
歌喧唱山川都姓劉矣 悲泣喚醒虞姬爲伊死別
血刃飛花碎霸業銷沉騅不逝氣盡烏江江江水古廟
頽垣斜陽紅樹遺恨鴉聲裏興亡休問高陵秋草空
翠

點絳脣 秋社

燕子依依曉來總爲誰歸去淡雲生處已覺賓鴻度

淺笑依顰便面機中素乘鸞女瑣窗瓊宇會有明年暑

烏夜啼 見天機餘錦

都無一點殘紅夜來風底事東君歸去太匆匆 桃花醉梨花淚總成空斷送一年春在綠陰中

又 見古今詞話

一彎月挂危樓似藏鈎醉裏不知黃葉報新秋 征鴻斷歸雲亂遠峯愁愁見綠楊凝恨在江頭

秦樓月 題蓬萊閣

烟漠漠海天搖蕩蓬萊閣蓬萊閣朱甍碧瓦半侵寥廓 三山謾有長生藥茫茫雲海風濤惡風濤惡仙槎不見暮沙潮落

又

秋寂寂碧紗窗外人橫笛人橫笛天津橋上舊曾聽得 宮妝玉指無人識龍吟水底聲初息聲初息月明江岸數峯凝碧

西江月 見翰墨

記得洛陽話別十年社燕秋鴻今朝相遇暮雲東對坐旗亭說夢 破帽手遮斜日練衣袖卷寒風蘆花江上兩衰翁消得幾番相送

尉遲杯

見梅苑

歲云暮歎光陰冉冉能幾許江梅尚怯餘寒長安信
音猶阻東風無據凭欄久欲去還凝竚憶溪邊月底
徘徊暗香疎影庭戶朝來凍解霜消南枝上香英
數點微露把酒看花無言有淚還是那時情緒花依
舊晨妝何處謾贏得花前愁千縷儘高樓畫角頻吹
任教紛紛飛素

洞仙歌

見梅苑

斷雲疎雨冷落空山道匹馬駸駸又重到望孤村三
兩茅屋疎籬溪水畔一簇蘆花晚照尋思行樂地
事去無痕回首湘波與天杳歎人生幾度能醉金釵
青鏡裏贏得朱顏未老又一點枝頭破黃昏問客路
春風爲誰開早

萬年歡

見梅苑

天氣嚴凝乍寒梅數枝嶺上開坼傅粉凝脂疑是素
娥妝拭先報陽和信息更雪月交光一色因追念往
日歡遊共君攜手同摘別來又經歲隔奈高樓夢
斷無計尋覓冷艷寒容啼雨恨烟愁濕似向人前淚
滴怎不使伊家思憶還只恐寂寞空枝又隨昨夜羌
笛

詞

綜

卷二十四

六一中華書局聚

鞞紅 見梅苑

粉香尤嫩霜寒可慣怎奈向春心已轉玉容別是一
般閑婉悄不管桃紅杏淺 月影簾櫳金隄波面漸
細細香風滿院一枝折寄故人雖遠莫輒使江南信
斷

憶少年 見梅苑

疎疎整整斜斜淡淡盈盈脈脈徒憐暗香句笑梨花
顏色 羈馬蕭蕭行又急空回首水寒沙白天涯倦
牢落忽一聲羌笛

琴調相思引

膽樣瓶兒幾點春剪來猶帶水雲痕且移孤冷相伴
最深樽 每爲惜花無曉夜教人甚處不銷魂爲君
惆悵何獨是黃昏

眼兒媚

蕭蕭江上荻花秋做弄許多愁半竿落日兩行新鴈
一葉扁舟 惜分長怕君先去直待醉時休今宵眼
底明朝心上後日眉頭

步蟾宮

東風揜就腰肢細繫六幅裙兒不起看來只慣掌中
行怎教在燭花影裏 更闌應是鉛華退暗蹙損眉

峯雙翠夜深著繡小鞋兒斜靠著屏風立地

搗練子

見天機餘錦

林下路水邊亭涼吹水曲散餘醒小藤牀隨意橫
猶記得舊時經翠荷開雨做秋聲恁時節不堪聽

謁金門

見天機餘錦

山無數遮斷故人何處見說蘭舟獨繫住溪邊紅葉
樹憶著前時歡遇惹起今番愁緒怎得西風吹淚
去陽臺爲暮雨

風光好

見天機餘錦

柳陰陰水沉沉風約雙鳧立不禁碧波心孤村橋
斷人迷路舟橫渡旋買村醪淺淺斟更微吟

天香龍涎香

瀛嶠浮烟滄波挂月潛虬睡起清曉萬里棹程一番
花信付與露薇冰腦纖雲漸暖凝翠席氤氳不了銀
葉重調火活珠簾日垂風悄螺屏酒醒夢好繡羅
幃依舊痕少幾度試拈心字暗驚芳抱隱約仙州路
杳謾珮影玲瓏護嬌小素手金篝春情未老

裴

湘字楚老仁宗時內官有肯堂集

浪淘沙

并門

鴈塞說并門郡枕西汾山形高下遠相吞古寺樓臺

詞

綜卷二十四

七一中華書局聚

依碧嶂烟景遙分 晉廟鎖溪雲簫鼓仍存牛羊斜
日自歸村惟有故城禾黍地前事消魂

僧揮 字仲殊安州進士姓張氏棄家為僧居杭州

吳山寶月寺有詞七卷

黃叔暘云仲殊之詞多矣佳者固不少而

小令為最

南柯子

十里青山遠潮平路帶沙數聲啼鳥怨年華又是淒
涼時候在天涯 白露收殘月清風散曉霞綠楊堤
畔鬧荷花記得年時沽酒那人家

玉樓春芭蕉

飛香漠漠簾帷暖一線水沉烟未斷紅樓西畔小闌
干盡日倚欄人已遠 黃梅雨過芭蕉晚鳳尾翠搖
雙葉短舊年顏色舊年心留到如今春不管

柳梢青

岸草平沙吳王故苑柳裊烟斜雨後寒輕風前香軟
春在梨花 行人一棹天涯酒醒處殘陽亂鴉門外
秋千牆頭紅粉深院誰家

僧祖可 字正平丹陽人蘇伯固之子住廬山與陳

師道徐俯謝逸預西江詩社有東溪集

吳虎臣云正平工詩其長短句尤佳世徒稱其詩也

小冲山

誰向江頭遣恨濃
碧波流不斷
楚山重
柳烟和雨隔
疎鐘黃昏後
羅幕更朦朧
桃李小園空
阿誰猶笑語
拾殘紅
珠簾卷盡
夜來風
人不見
春在綠蕪中

菩薩蠻

西風簌簌低紅葉
梧桐影裏銀河匝
夢破畫簾垂
月明烏鵲飛
新愁知幾
一作那致
許欲似絲千縷
鴈已不堪聞砧聲何處村

又

誰能畫取沙邊雨
和烟澹掃蒹葭渚
別岸却斜暉
采蓮人未歸
鴛鴦如解語
對浴紅衣去
去了更回頭
教儂特地愁

釋惠洪

字覺範有石門文字禪

許彥周云上人善作小詞情思婉約似秦少游仲殊參寥皆不能及

青玉案 和賀方回韻

綠槐烟柳長亭路
恨取次分離去
日永如年愁難度
高城回首暮雲遮
盡目斷知何處
解鞍旅舍天將

暮暗憶丁寧千萬句一寸柔腸情幾許薄衾孤枕夢
回人靜徹曉瀟瀟雨

上清蔡真人

法駕導引

闌干曲闌干曲紅颺繡簾旌花嫩不禁纖手捻被風
吹去意還驚眉恨蹙山青尸堅志云陳東靖康間嘗
飲于京師酒樓有妓倚欄歌此詞音調清越東不覺
傾聽其後有鏗鐵板閑引步虛聲塵世無人知此曲
却騎黃鶴上瑤京風冷月華清五句問何人所製曰
上清蔡真人詞也

于真人調見彭致中鳴鶴餘音按北宋有虛靖真
君詞內有和于真人作

鳳栖梧

綠暗紅稀春已暮燕子銜泥飛入垂楊處柳絮欲停
風不住杜鵑聲裏山無數竹杖芒鞋無定據穿過
溪南獨木橫橋路樵子漁師來又去一川風月誰爲
主

行香子

閨苑瀛洲金谷重樓總不如茅舍清幽野花鋪地算
也風流却也宜春也宜夏也宜秋酒熟堪筍客至

須留更無榮無辱無憂退閑一步著甚來由但倦時
眠渴時飲醉時謳

葛長庚自號白玉蟾閩人一云瓊州人居武三嘉

定中詔徵赴闕館太乙宮封紫清明道真人有海瓠集詞二卷

醉江月武昌懷古

漢江北瀉下長淮洗盡胸中今古樓櫓橫波征鴈遠
誰見魚龍夜舞鸚鵡洲雲鳳凰池月付與沙頭鷺功
名何處年年惟見春絮非不豪似周瑜壯如黃祖
亦逐秋風度野草閑花無限數渺在西山南浦黃鶴
樓人赤烏年事江漢亭前路浮萍無據水天幾度朝
暮

水龍吟採藥徑

雲屏謾鎖空山寒猿啼斷松枝翠芝英安在木苗已
老徒勞屐齒應記洞中鳳簫錦瑟鎮常歌吹悵蒼苔
路杳石門信斷無人問溪頭事回首暝烟無際但
紛紛落花如淚多情易老青鸞何處書成難寄欲問
雙蛾翠蟬金鳳向誰嬌媚想分香舊恨劉郎去後一
溪流水

水調歌頭

詞

綜卷二十四

九中華書局聚

江上春山遠山下暮雲長相留相送時見雙燕語風
檣滿目飛花萬點回首故人千里把酒沃愁腸回鴈
峯前路烟樹正蒼蒼漏聲殘燈焰短馬蹄香浮雲
飛絮一身將影向瀟湘多少風前月下迤邐天涯海
角魂夢亦淒涼又是春將暮無語對斜陽

摸魚兒

問滄江舊盟鷗鷺年來景物誰主悠悠客鬢知何事
吹滿西風塵土渾未悟謾自許功名談笑侯千戶春
衫戲舞怕三徑都荒一犁未把猿鶴笑君誤君且
住未必心期盡負江山秋事如許月明風靜萍花路
欹枕試聽鳴櫓還又去道喚取陶泓要草歸來賦相
思最苦是野水連天漁榔四起簑笠占烟雨

霜天曉角 綠淨堂

五年安在城市何曾改十萬人家闐闐東亦海西亦
海歲歲蒲瀾會地接蓬萊界老樹知他一劍千山
外萬山外

賀新郎

且盡杯中酒問平生湖海心期更如君否渭樹江雲
多少恨離合古今非偶更風雨十常八九長缺歌彈
明月墮對蕭蕭客鬢閑攜手還怕折渡頭柳小樓

夜久微涼透倚危欄一池倒影半空星斗此會明年
知何處蘋末秋風未久謾輸與鷺朋鷗友已辦扁舟
松江去與鱸魚蓴菜論交舊應念此重回首

又送趙帥之江州

倏又西風起這一年光景早過三分之二燕去鴻來
何日了多少世間心事待則甚功成名遂楓葉荻花
動涼思又尋思江上琵琶淚還感慳勞夢寐 愁來
長是朝朝醉刻地成宋玉傷感三閨憔悴况是淒涼
寸心碎目斷水蒼山翠更送客長亭分袂閣阜山前
梧桐雨起風檣露舶無窮意君此去趁秋霽

又肇慶府送談金華張月窗

謂是無情者又如何臨歧欲別淚珠如灑此去蘭舟
雙槳急兩岸秋山似畫况已是芙蓉開也小立西風
楊柳岸覺衣單略說些些話重把我袖兒把 小詞
做了和愁寫送將歸要相思處月明今夜客裏不堪
仍送客平昔交游亦寡况慘慘蒼梧之野未可淒涼
休哽咽更明朝後日纔方卸情默默斜陽下

亂仙

憶少年

淒涼天氣淒涼院落淒涼時候孤鴻叫斜月伴寒燈

殘漏 落盡梧桐秋影瘦菱鑑古畫眉難就重陽又
近也對黃花依舊

詞綜卷二十四

珍做宋版印